

МИХАИЛ ДАДАШЕВ


**ХЪЭЛОЛЕ
МЕРД**



МИХАИЛ ДАДАШЕВ

ХЪЭЛОЛЕ МЕРД

(Ихдилотгъо)



Дагестанское
книжное издательство
Махачкала — 1972

С (Тат)
Д 14

СЕРНОМЕ

Хьэлоле мерд	3
Дендунедерд	9
Одоми	13
Патент	16
Пуче зиндегуни	19
Кегьрсбое хушегьо	24
Келе мерд	25
НесигІэт	26
Мерд не кукле	27
ГІэзиз	30
Гъуш не овчи	31
Билогъ	33
Хуышг бире чол	34
Деде	35
Шаргьо	37
ГІуьзетлуье гъуногъ	38
Метлеб зиндегуни	50

«ХЪЭЛОЛЕ МЕРД»

И могьой мешинохошит, ишму кура Шевениёре нешинохде нибошит. Гуфдиренуым — нешинохде нибошит эз хотур эню кор нэгI, гуйге е вегирлуье, гIуьзетлуье, хьохмолуье одоми бу гуфдире. НэгI. Хуби, гIуьзетлуьи эри эню, коргьой гуюгьоре хуно, эз ки худош неоморebu. Э песой муьрде гоф сохдеш хуб нисди. Оммо гуьом эришму, омбор нелоигъэ, бедгIэсуьле, темэхькоре мерд бу. У гьеле е бисд-си салигеш мимунд мигешд э и гIуьлом эгенер ужире усоле, темэхькоре одоми нибисдоге. Чуьнки кура Шевениё шасд сале келе мерд бугеш, эз е паре жогьилгьош жогьил веди бирембу. Буй-балай эню тим-тик бу, сифет ю — шумол, гьич е тикелеш гьуьж недиреморе, чум ю тиж, гуйге сенгъэ сула мисошу, рушгьою сип-сиёгь.

Гуфдиренуым, кура Шевениёре нешинохде нибошит, чуьнки у согъ гIуьмуьр хуьшде э базаргьо, э пушой эн тукугьо — магазингьо муьрдебу мунде. Эз хотур е чум ю кур бирей у хуьшдере инволид, шуькест гуфдире гьич э гIуьмуьр хуьшде кор несохдебу, жофо, зэхьмет некеширебу, эз пэхьники, эз зир дес алвари сохдембу гешде. Хьэрмэхьгьой эню омбардекигьош э колхоз кор сохдембируьт, кимигьо рангчи, демирчи бируьт, кимигьойге э довгIо жун ишуре э женг эри Ватан доребируьт. Оммо э пире вэхд уре не дусд, бу, не

хьовир. Чуьнки хьэрмэхьгьой энү денишире диренге, ки кура Шевениё э дуьзди-дургуниревоз зигьисде, угьо эзу рэгІд, дур бисдоруьт, эри эн угьо хуьрди, элчэгъи оморембу э ижире одомиревоз эри хьовири сохде, дусди гердунде. Оммо эн кура Шевениё э хэпер юш небу. У эз гьемме э и гІуьлом эз дусдгьо, хьэрмэхьгьо, бирорхэгьер, эз номус, хьэе ве гьирьет пуле омбор хосдембу. Э овосунегьо гуфдиренуьт нешумой эн гьеждогьо э гьуш гьэфеси дери, оммо эн кура Шевениё ношумою э пул, э суьрх дебу. Ю хуьшдени кура Шевениё э гьенегевоз мугуфди: «Урусгьо гуфдиренуьт: «Туьре сад монет бирейнжо сад дусд бугу», оммо э гуфдиреймеревоз: «Сад дусд бирейнжо одомире сад монет бире хубтеи». Гисне керг э хов чуьтам эрзуьре дирениге е чум энү э ховиш, э эврейш гье адембу пуле, монете дире. Эри е чире э дуьвойне гьимет фурухде э муьшдери, сер энуре пучунде, у э гьоврей бебе-дедей хуьшде шовгІо мисохд эдее эри хуьшде э зарали фурухде гуфдире. Гьемин эри ижире одомигьо гуфдиренуьт э метелегьо: «Беймере куьшдем э гьоврею шовгІо сохум гуфдире».

Ё кепик уре гьэзенж дорегор небисдоге, у кепике бей хуьшдереш бэхширенигьо одоми небу. Эзи ченд сал пушо суьфде хэгьер эн кура Шевениё, пезде домор ю муьрдебу. Эзугьо е духделе мундебу, сиздегь сале гІэил. Духделере де кесиге небу эз кура Шевениё холушу бэгъэй. Чорей Шевениё небисдо вегуьрд овурд духделере, хэгьерзорей хуьшдере э ки хуьшде, егІни э пушой хэлгь уьзуьгьэре неведиров, биебур небу. Духделе согь руз гьэревоше хуно эдембу кор сохде э хуней холушу: руфде, вечире, шушде, гьемише э сер пой вебу. Зен эн кура Шевениё Сироти гьеми дие келе зен бу, гьеми нечогъэ одоми. Оммо суьпуьл эн кура Шевениё эдембу жэгьуьсде духделе э хуней ю эдее е лугъэ нун хурде гуфдире.

«Чуь хэйри ме и духдере эдее дошденуьм гуфдире

эз зарал бэггэй? — Фикир мисохд у эри хуьшде.— Пушотегьо духдере э шуьвер доренге эри эну пулрэхьи семе восдорембу. ГьейсэгIэт неки пул-рэхьи, бебегьо-дедегьо эз хуьшде доренуьт жиггыз эн духдере. НэгI... о, и духдер э хунейме зиггисде келе бирей эриме омбар зарали...»

Егилейге кура Шевениё эри хуьшде фикир сохд, ки э дин туроревоз холу хэгьерзорей хуьшдере хосде гIэмел оморени. «Ме и хэгьерзорей мере гьовой эричуй нун доре дошденуьм,— мугу у э дуьл хуьшде,— мегуьруьм михогьум эриме. Гьечинигеш эз Сироти дие фойде нисди, келе зени, нечогьи, э уревоз, гIэйбиш бу гуфдире, зени-шуьвериш дире нисе бире».

Ижире хэьлгьо э дуьл эну дерики, кура Шевениё вэхуьшд омо э нимаз э ки раби э уревоз эри меслэхьэт сохде. У гIэре-бир э нимаз рафдембу, э рабиревоз шинохи-дусди гердундембу. Раби гуфдиренге эзу эз расдиш э мишно вери холу хэгьерзорей хуьшдере э зени вегуьрде мидануь гуфдире, дуьл эн Шевениё хомуш, шор бисдо.

— Рэхьмере гуьрдигьо энжэгь е кори,— э хуьшде домунде мугу кура Шевениё эз раби, дуьл хуьшдере очугь сохде эри эну,— хэгьерзорейме чуклелеи, сиздегьире верасди э чордегьи пой донере.

Раби гене дуьл энуре жэгIм сохде, мугу:

— Э дин эн туроревоз духдер дуьвездегь сал не е руз эз гIуьмуьр томом биренге уре э шуьвер доре ихдиёри.

Шори эн кура Шевениёре гьэдер небу. У имогьой эри хуьшде ниет сохдебу хэгьерзорей хуьшдере э пэхьники эри мегьр сохде, хосде эри хуьшде. Оммо духделе дануьсденге, чуй элчэгьэ, беде фикиргьо дериге э дуьл эн темэхькоре, суруле холушу рузгьой е рузгьо вирихд эз хунегьо. Е хэйли вэгIдо гирошде бэгьдо мэгIлуьм бисдо, духделе э детдом дарафди гуфдире.

Е гиле Сироти сэхд нечоґь бире дие эз хьэлов невэ-хуышд. У дуй бэхшиш хэсде, нечоґь эз сэгьэти, гьуьд-гьуьди, лугьэшумори эн шуьвер хуышде бу. У э е лугьэ нуревоз гушд зене хурдембу гьемише. Се мегьиш некеши зен энэ — Сироти сэхд нечоґь бире, офдо муьрд.

Сироти эри кук не гIэруьс хуышде весиет норебу: ю муьрдге тозе гьобожуре э сер эхиротию венуь гуфдире. Эз дуьли эн кура Шевениё небу и тозе гьоборе ве-гуьрде гьечи пуч сохде. «И гьобо э хэйли пул мирав, чуйтам денуьм пуч сохум уре?» — эдембу фикир кешире Шевениё. Дие чорею небисдо, эри биёбур небиреи э пушой гIэилгьо, гьунши-мэхьэле у гоф несохд, зене э гьовре сохдеки тозе гьобореш доно э кию.

Се мегьиш негиросхд эз Сироти зен энэ муьрде эйло, кура Шевениё дие э кучегьо-базаргьо веди небисдо, у дерзей Шолум — дерзире хуно вир-сур бисдо. Э гьуншигьо-мэхьэлегьо лов бисдо, ки кура Шевениё эз зен ю муьрде эйло фетге вегуьрди, э хьэлов дери, ранг ю рафди, рушгьою сипи бири, е муй е мерези, эдее муьрде. Омбаргьо гьечу дануьсдембируьт кура Шевениё эз хьэйф, дерд эн муьрдеи зен хуышде гуйге э и хьол офдори, муьрдеи эн зен лап э остгьу-уьлуьг ю расири, зеде зери. Оммо себеб эз хьол офдореи, гурунд нечоґь биреи эн кура Шевениё эслоґь е кориге бу. Ини гьейсэ-гIэт ихдилот сохум эришму.

Е шев э хов э пушой кура Шевениё э сипре эхироти дери зен ю Сироти миёв мипою, мугую:

— Эй мерд, э хуней бебейтуь гIэтош дараво, туь чуйтам дуьл сохди, гьимиш сохди, вегуьрди гьоборе э гьоврей ме донори?

— Ме весиет туьре эжиге овурдем, — жогьоб до кура Шевениё. — Биригьо-бири, дие пешмуни эричуь кешире туь?

— Пешмунлугь гоф нисд инжо, — мугу Сироти. — Ме пушой муьрде фурмуш сохдебируьм э туь гуфдире, ки ме эз пэхьники туь э бел гьобойме е ченд эршефи

духдем, бесдем. Угъо гъечу э бел эн гъобойме вомунди рафде.

У шев кура Шевениё се гиле мивинуь и хове. Е парагъо гуфдиренуьт, бовор сохденуьт: ки е чире сегиле хов диге у хов — расди. Кура Шевениё се гиле диренге и хове, серсуре хуно бире, гъуй мизенуь эз хъэлов мивэхизуь. Дие э чум эну хов ниёв. Э фикиргъо-мэхъшово-гъой эну имогъой энжэгъ у бел гъобой эн Сироти зен ю духдебугъо эршефигъо мидебу.

— Э рошогI, э нелоигъ,— мугую э дуьл хуьшде кура Шевениё, нифри-офри сохде зен хуьшдере,— туь пушой муьрде, тасирейтуь эйчуь негуфдирей э ме и коре?! Туь темэхъ сохде мегири эршефигъоре э хуьшдере-воз мибери? Негъогъ э сер гъоврей эн зен се лапатке хок зиёд ние вонореки.

Эзу шев айло согъ руз кура Шевениё э думит-хэёл эн пэхъникие эршефигъо дебу. Чуь сохуге ние дануьс-дембу.

«Ме имогъой келе мердуьм,— эдембу фикир сохде у эри хуьшде,— меки согъ гIуьмуьрме не э колхоз, е небуге эри хуьькуьмет е кор несохдем. Унегуьре мере пенсия-чи дорегор нибу. Эз кук-гIэруьсиш фойде нисди. Э кукгъо-гIэруьсгъо вомуно дуьшме. ГъейсэгIэ-тине гIэилгъо гьер мерд эри хуьшдеи. Угъо энжэгъ эз бебе-деде векенденуьт. Оммо бебе-дедере дошде эз угъо нисе вероморе. Иллогъки эз кук ме. У гъемише эз ме гъэгъри — бирази бу, егIни, гуйге, ме э дедей энугъо гуж сохдем, э у е руз небирмундем, беле, филон... У эршефигъо, Сироти э бел гъобой хуьшде духде пэхъни сохдигъо, могъгъул мере лап герек мибисдо эри пире домунде рузме...»

Ижире думитгъо, фикиргъо эдембу хурде-вегуьрде дуьл энуре, гиж сохде сер энуре.

«Чуьтам бурам ме биле э душ веноре э пушой эни хэлгъ-хэлоигъ векенуьм гъоврей Сиротире, вегируьм эршефигъоре эз бел гъобой эну?» — ченд бо думит, еро-

вурд сохдембу у эри хуыште, жингир — серсоне хуно э хуышдеревоз гоф сохде.

... Е гиле шев торик биренге кура Шевениё эз сарай лапаткере вегуърде эз пэхьники гъунши-мэхьэле, дирешинохдогор, ведарафд эз шегьер, рафд дуз э сер эн гъоврегьо. Э дуъл энуге сегьмиш оморембу, оммо темэхь эн эршефигьо, угьоре эри вегуърде уре гуйге жуьргIэт доре гьишдембу пой вечире. Э сер гъоврегьо торик бу, лос бу. Сенггьой гъоврегьо гуйге хуышг, мэхьтел мунде одомигьоре хуно поисдебируьт, денишире э кура Шевениё, чуьтам у э дуьзди биёвгьоре хуно, шев-нимешев омориге эри гъоврей зен хуышдере векенде.

«Нум худой гуфдире» кура Шевениё сер гуьрд гъоврей Сиротире эри векенде, э иловле чуме-чару сохдесохде. Е сесле э гуш энуге дарафде мунде у гьеусэгIэт хуышдере вешендембу. Эз терс, эз сегьм ве хьэлежигери уре гIов-эрэгъ шиширебу. У килэхьэ эз сер вегуърде, пинджеке векенде эз тен хуыште но э гъиругь эн гъоврей ю сук бу гуфдире.

Гъоврей уже рохьо бу, вокурде оморембу. Кура Шевениё гъуз бире, дес кешуь вегуьруь гуфдире гъоборе эз сер эн муьрде, бирден киниге эз песой кемер э е зарбевоз э дуьдесиревоз сэхд гуьрд уре. У гьечу дануьсд, киниге эз муьрдегьо векуьшди эз гъоврей гуьрди уре, енебуге молкомут омори жун юре эй берде. Оммо эз кура Шевениёре сэхд гуьрдегор е гоф, е сес нисе ведиреморембу. Зэхьлей эн Шевениё рафд, э у гъувот недомунд. Бирден у эз терс жун хуыште е келе хьэрой, е божэхь дешенде, чуьтамиш гириге ведешенд хуышдере эз гъэл юре буховуре хуно сэхд гуьрдегор, килэхьсуьз, пинджексуьз вирихд шуш нефес гуьрде э лой эн шегьер, дуъл юре берде-берде.

Гъэреулчи эн гъоврегьо е гъэдер видовусд эз песой эн, хэрегуше хуно бежид вирихдембугьо, кура Шевениё, песде килэхь не пинджек энуре вегуърде вогошд э жигей хуыште.

Эзу шевевоз дие кура Шевениё э пой невехуьшд, эз хьол офдо, сэхд нечоғъ бисдо. Гьечи руз бе руз э пушой чум хьэл бире, мерез бире, офдо муьрд. Оммо кимигьо гьечу дануьсдембируьт, у эз дерд-хьэйф эн зен хуьшде муьрди, мугуфдируьт уре э берде гьовре сохдеки:

— Диренит, чуь хьэлоле мердиге: се мегьиш некеши зен ю муьрде, юш муьрд рафд э кию. Хьэлоле мерди, фэгьир...



ДЕНДУНЕДЕРД

Шегьер иму раче шегьери. Э пойнею ковре дерьёг э зир чуьшме эдее руьгь-руьгь доре, э звер сер ю савзелуье догъгьо, кервугьоре хуно поисдет. Э иловлей шегьер онгур-богъгьои. Оммо э кучегьо гьобгьой эн хокорудеки гьисдигеш, чуьлк, зил-зибилиш кем нисди. Песде шегьер иму чуькле шегьери. Э гьержой е корчи бисдо гье у сэгIэт гьеме дануьсденуьт. Ини меселен, гуюм, директор эн завод шегьер имуре Нэхьшун Севиевиче Шафадове е гиле дендунедерд гуьрдебу. Дендунедерд э гIуьмуьр хуьшде негуьрдегор кини? Оммо эз товун дендунедерд гуьрдеи эн у е нимсэгIэтиге бэгьдо гьеме уже дануьсдебируьт.

Гьисди инжо унгъэде гоф эн директоре дендунедерд гуьрдеи нисди, чендгъэде эн де коригеиге. Гуш венит ихдилот сохум эришму.

Руз дуьшобот Нэхьшун Севиевич эз кор оморенге, хуб-хос нуьшдебу э хуне э зенгьо-гIэйилгьоревоз эричи хурде. Бирден румкей коньяке э буз водореки, гуйге дендуй эң уре э е келе гьуйгъэвоз киниге доно сула сохд. Эз дорд дореи, эз гьээоб эни кор чумгьой эн Нэхь-

шун Севиевич лап э гъофою верафдуът. (Чумгъой энү гьечиннигеш келе бируът. Уре «буьхьуьлуь чумгъо гуфдирембируът. ГъейсэгІэт гуйге гьерки энугъо ченд е пейле бисдорут.)

Шафадов гъутиней хуьшдере гуьрде э десевоз ноле зере-зере рафд дегешд э хьэлов. У гогъ э дендуй хуьшде одеколон декуьрд, гогъ лэгІэре пара сохде жуьх гуьрде лугуре доно э донду. Оммо дорд дорей энү непонсд. Гуфдиренуът: киниге дуьшмен хуьшдере нифри сохденге гуфдиребу эзу «Туьре вином сад сал гІуьмуьр гердо, навад сал дендунедерд». Ингъэде беде чини и дендунедерд. Гуйге раггъо-ришегъой эн сер, лэгІэй энуре э келбетиревоз киниге эдембу эз бине кешире ведешенде, ришегъой эн темиз сохде жэгІэ кешире ведешенденигъоре хуно.

Согъ шев небеледе раби куьшде керггъоре хуно парпар сохд э хьэлов директор. Е мижелеш чум энү э хов не верафд. Не екиш э хуне эз ноле-тартапили энү хисире недануьсд. Э гъэд эн е шев гъутиней энү шиши-вамаси нун тонуире хуно. Гъутиней хуьшдере э деспокуревоз бесде, себэхьмунде Нэхьшун Севиевич, уьгъ зере-зере, лойлум хурде-хурде, эз и сэхд эз гъувот офдоре одомигъоре хуно, рафд э поликлиника.

Э поликлиника дендуй эн директоре темиз сохдуът, дерму декуьрдуът, э блombавоз сэхд сохдуът. Е сэгІэтиге бэгъдо у шори-шори вогошд э хуне, эз деде бирере хуно. У эз денду рэхъэт бисдоки, э чум энү хов омо. Суьфделе Нэхьшун Шафадов дегешдебу эри феригъэти вегуьрде, бирден сес эн зенг телефон омо. У вегуьрд трубкаре, гуш дошд.

— Нэхьшун, руз туь эхэйрбу? Чуьтами дендуйтуь? Ме эзже дануьсденуьм туьре дендунедерд гуьрди гуфдире? Эриме зен ме гуфди, у э поликлиника кор сохде. Хуб бири гуфдири? Тозе эз деде бирере хуно. Омбар хуб. Дие согъ боши. Шохьонгум мохурим э еки...

Э дусд хуьшдеревоз гоф сохдки дуьл эн Нэхьшун

деш шор-хуьром бисдо. Вамасире гьутиней энү гьеле ненуьшдебугеш, екемлей дондуй энү гьеле дорд дорем-бугеш, гьовой эн Нэхьшун хуб бу, куьк бу. Ловгьой энү эдембируьт эз хуьшде хэндуйьсде.

Шафадов оморени э сер диван эри дегешде, бирден гене сес зенг эн телефон э гуш энү дарафдени. У вегуьрдени трубкаре.

— Нэхьшун Севиевич? — пуьрсирени секретаршей энү эз жиге кор.— Эришму когъоз омори эз Министерство... Дендушму чуйтами? НэгI, екиш телефон не зербу. Согъбошит!..

«Денишит ебо! Эз товун мере дендунедерд гуьрдеи э заводиш хэбер расири, чуьнки ме э пушой хэлгь ведилуье одоминуьм. Эз товун е пара одомигьо муьрде-шуреш, дуразруйме, хэлгь бегьем нисе дануьсденуьт, оммо эз товун е дендудордореиме уже нимей шегьер дануьсдени, ингъэде мере нум, хуььрмет гьисди» — э дуьл хуьшде э текебуриревоз, эз хуьшде шори сохде, мугу Шафадов.

Бирден э ёр энү омо эз товней когъоз эз Министерство оморигьо. Дуьл энү гьеусэгIэт хэреб бисдо. Коргьой энү э завод хуб небу. Завод производственный плане бегьем нисе сохдембу. Завод ведешенде продукция э хуьькуьмет бугьо нуьшдембу. Песини гиле уре э Министерство огол зеренге эз у гуфдиребу, эри заводе рэхьбериети сохде недануьсдеи министре хэёли уре эз пост директори эри вегуьрде, е божоренлуье одомире эри норе э жигей энү.

Тоб недоре, гье э вамасире гьутинеревоз, Нэхьшун Севиевич зури-зури оморени э завод, дарафдени э кабинет хуьшде. Когъоз эз министерство оморевугьо э сер стол энү вебу. Бомба э дес вегируьгьоре хуно терсе-терс, дестгью лерзире, мегуьруь эз сер стол. Дуьл ю эз битоби не эз сегьм гуйге бэгIэвече эз лулей хуьшде пар зере вирихуьгьоре хуно, гьейсэгIэт учмиш мибу. Когъозе хунде мунде ранг эн Шафадов зерд, гилове ху-

но мибу, дуъл ю дорд мидуь, э у гене миёв дендунедерд мепичуь. У гьеле э хуне оmore не расиребу э шегьер мегІлуьм бисдо уре эз кор ведекуьрди гуфдире. Гье у руз шохьонгум Шафадов э хуне тоб недоре гьеми эз дерд, фикир юре эз кор вегуьрдеи, гьемиге эз дендунедерд, гьутиней хуьшдере сэхд гуьрде ведиромо э куче. У эдембу чуме-чару сохде гьеркире бисдо эз шинохгьой хуьшде винуь, гоф соху э уревоз, дердгьо-дуьлесдигьой хуьшдере гую, екем дуъл хуьшдере очмиш соху.

Мугуиге э хёёл эн фикиргьой Шафадов дери, э пушорэхьи эню омо ведиромо экспедитор эн завод, е жогьиле кук. У директоре е верс дуриш мивиниге гье у сэгІэт зури-зури миомо э ки эню, дес юре э дуьдесире-воз мигуьрд, лове э мигьровуние хэнде веберде хьол-овхьол юре, эн кифлет юре мипуьрси, согьбоши мигуьфди, мирафд песде рэхь хуьшдере. Шафадов поисд, гузет сохде, кей экспедитор миёв мирасуьге э лой ю. Оммо экспедитор э ки эню оmore расиренки, у гьич хуьшдере э дирейш невоно, зе эз ён эню гирошд, гьич руз эхэйрбуш недоре уре.

Нэхьшун э могьбулиривоз хэндуьсде, сере жумунде, рафд рэхь хуьшдере. Е ченд минут гирошде бэгьдо мивинуь эз у тарафигей куче эдее секретарша оmore э пушорэхьи ю, жогьил, рач, лов-гьутине ранг зере. У поисд, гузет сохде, лове э гужевоз э хэнде веберде, кей духдер эз ю куьнд бире, гоф мисохуге э уревоз. Оммо секретаршеш, у жогьиле куке хуно, хуьшдере э недирей веноре зе гирошд эз бинебуз эн Шафадов. Дуъл эню эз мунде жигеш хэреб, догьуногь бисдо, дендунедерд ю гужлуь.

Ме и коре, э сер эн Шафадов оморигьоре диренге, воисдембу мере хьэрой сохум, поюнум секретаршере, гуьом эз у келе-келе:

— Эй хунехэреб нисди, екем семе рэхьм биёвгу туьре: и дендуй эни мерд эз расдиш эдее дорд доре эхи!...



ОДОМИ

Паровоз, зере еки эзу келе божэхъгьой хуьшде, евош-евош кеширени э песой хуьшде вагонгьой поезде. Песово мунденуьт жергей гъовогъ доргьо, ченд тебэгъэи тозе хунегьой сенгьи ве гъэдимие гъэлей эн шегьер...

Рафде-рафде нефес поезд бирени дуз, сес черхгьой ю бирени хомуш.

Эз гъэд эн вагон буй жэгI эдембу оmore. ЖэгIгиргьо эдембируьт эз ветэгъэгьо э хунегьошу вогошде, мигуиге угьо вегуьрдебируьт э хуьшдеревоз буй муьнуьклубе шаргьой дерьегье. Э чужо буге, лап э гъирогъ вагон, ки буге эдембу зере гармонь ве эз хиники дерьегъ гуьрде сесевоз хунде мэгIни:

— Бовор месох, жэгIгир, э гъовой асму,

Небуге песде мибоши пешму...

Ве ченд жире сесгьо э эшгъэвоз гье и гофгьой мэгI-нире хунденуьт. Рач хунденуьт жэгIгиргьо мэгIнире, оммо эз товун ишу нуьвуьсде оmore мэгIнире диеш рачте, эшгълуьте хунденуьт, чуьнки гофгьой эню мэгIни серин, хош сохде дуьл энугьоре.

Еки эз жэгIгиргьо бу екем серхуш, кефлубе. У гъуьндуьре бала, зерде муйгьо бу, сифет ю гъуьже-гъуьж. У веноре десгьоре э сер полке, эдембу папрус кешире, евошлей хунде мэгIнире:

— Бовор месох, жэгIгир, э гъовой асму,

Небуге песде мибоши пешму...

— Гражданин, папрус мекешит! Э гъэд вагон папрус кешире гIэмел нисе оmore! — гуфдирени эз и жэгI-гир проводница, е раче дуждер, имогъэ хуно бугьо вини ю.

— Ш.. ш.. ш.., — гуфдирени эзу жэгIгир, гуше э лой мэгIни хундегоргьо веноре. — Гуш венит чуж рач мэгI-ни хунденуьтге...

Песде юш сер гуьрдени келе-келе эй хунде:

— ... Небуге песде мибоши пешму...

Проводница, гъэгъри бире, дур рафдени эз ён жэгІгир, песде, хэсде бирере хуно, нуышдени э е купейге, э десевоз бирмунде э лой жэгІгир, гуфдирени:

— Иш одомини?! Хурди эрэгъире, чешмиш бири, э гоф гуш нисе веноре. Э гъэд вагон ижире коргъо гІэмел оморе?

Кимигъо э купе нуышдегоргъо хэндуьсдуьт, гофгъой проводницаре шиновусде. Энжэгъ еки эз пассажиргъо э купе нуышдегоргъо э сифет эн комики вебу е дуразе жигей эн куьгъне яра тигъэтлуь дениши э проводница, песде мугу эзу:

— Одомире нешинохде, е хуби энуре, енебуге зобуни энуре гуфдире герек нисди. У мерде ме хуб шинохденуьм. У екем хурди, серхуши, чуьнки имбуруз мигІид энугъои, эн жэгІгиргъо. Э у бэхшлемиш сохде гереки. Гъечиниге омбар хубе, лоигълуье одомини. Егиле у мере э жун хуьшде гъимиш несохде эз гІэжел хилос сохди.

Гъеме э купе нуышдегоргъо, хуышдени эн проводницаш э е томошеревоз денишируьт э жиге куьгъне яра э сифет вебугъо мерд.

— Негуит эриму гъозие-гъэдер эни коре,— мугу проводница.

— Бошгу, гушвенит,— э разимендиревоз гуфди пассажир...— Ме хуышденимеш жэгІгируьм, ветэгъэчинуьм... Зу бире кори, е бисд сал мибу. Ме суьфделе сер гуьрдебируьм эри жэгІгири кор сохде. Ме увэхди лап жовон бируьм. Гъемин мегъ эн март бу. Э мегъ эн март жэгІгъо: залумгъо, кутумгъой эн Каспий омбар руьгъэни, лезетлуь биренуьт. Оммо кими вэгІдо сэхде кулокгъош вокурденуьт. Увэхди э сер дерьёгъ келе шаргъо вебире, дерьёгъ туьнд, хьюьршлуь бире. Гуйге увэхди уре нисе воисде екиш эзу куьнд биёв.

Гъемин гъе у руз, э сер ме и кор омorigъо, иму е ченд одоми э баркасевоз ведарафдим э дерьёгъ. Суьф-

де гьово сокит бу, дерьёгъ — хомуш. Оммо е-дуй сэгІэг гирошде бэгъдо э гьово лап сэхде кулок вокурд. Шаргьой дерьёгъ гуйге хьуьрш зере дуй э песой еки эдембируьт шишире оморэ э сер иму. Баркас имуре шаргьо тилиш эн тэхдере хуно эдембируьт эзило зуло пертово доре.

Пассажир екем э хуьшде домунде, э жиге куьгъне ярай хуьшде дес зере, юре гІэйб оморере хуно лове э хэнде веберде, мугу:

— Ме гуфдируьмки: ме увэхди лап жогьил, небелед бируьм. Ижире шаргьоре диренге э сер эн дерьёгъ ме терсируьм. Сермеш гиж хурд. Бирден е шар мере зе эз пой венгесд. Сер ме деш гиж хурде, чумгьой ме тор бире, офдорум э дерьёгъ, гуйге еки мере вегуьрд эз баркас гьуьл зеге э гьирогъ. Сифет меш гье и вэхди э е тижэ чи раси,— пассажир гене десе зе э сифет, жиге куьгъне ярай ю вебугьо.— Шаргьо мере гуйге зипзуьнде эдембируьт суьперде, гисне гуьрг верере суьпердере хуно. Мере не гьувот, не иллож небу э шаргьоревоз эри борж берде. Хилос мибошум гуфдире эз гьэдэни шаргьо мере эслогъ имид небу. Гювиш э дерьёгъ хиники, жилиди. Жендек мере гуйге эдее киниге э бизгьоревоз сула-сула сохде.

Гьемин э и вэхди э гуш ме е сес дарафд, киниге э ён ме эдее хьэрой сохде: «Ибрагим! Сэхд ги расере, метерс, ме э ёнтуьнуьм, метерс!..»

Десгьой ме эз хиники кут-шуьл бугеш сэхд гуьрдуьм расере. Песде егилейге эз хов хэбер бирере хуно мивинуьм ме э сер баркас веруьм. Гьутиней ме бесдеи, э гуш ме гене сес эн бригадир иму эн «дядя Вася» (бригадир имуре гьеме гьечу огол зерембируьт) дарафд: «Имогьой туьре жовон сад сал гІуьмуьри. Эз немуьрде жиге хилос бирей...»

Оммо хуьшдени «дядя Вася» эз хиники гІов эн дерьёгъ мере э хилос сохдеки сэхд суьтенжем бире, нечогъ бире, немуьрдегьо хилос биребу...

— Эжеи имогьой у мерд, «дядя Вася» гуфдиренигьо? — пуърси жогьиле проводница, угьонигеш чум доноре пойсдуът э Ибрагим, у чуй жогьоб мидуьге.

Ибрагим лове э мигьровуниие хэнде веберде, бирмунд э десевоз э лой энун мерд, гьундуьре бала, гьуйже-гьуйже сифет, десгьоре э сер полке веноре, мэгИни хунденбугьо.

— Гьемин гье и мерди «дядя Вася». Омбар хубе, лоигьлуье одомини.

Эз екиш гоф не ведиремо. Поезд эдембу рафде рэхь хуьшдере. Сесгьой черхгьой юш нисе оморембу, мигуиге угьош, гуш веноре, эдембируът шиновусде и ихдилоте эз товной одоми.



ПАТЕНТ

Себэхьмунде бу. Э кабинет диреморей заведующий финотдел эн район гьеле е дэгьдэгьэш не кеширебу, дер куфде омо. Песде, евошлей дере вокурде, ки буге, гІэйб оморере хуно, пуърси:

— ГІэмел миёв?..

Э жогьоб доре не денишире, у денорени сере эз дер. Веди бирени сифет ве чумгьой эн дироморегор, комигьоки ухшеш зерембируът э чумгьой терсунде хэрегуш.

— Руз ишму эхэйр бу, — гуфди дироморегор, куьнд оморез стол эн заведующий.

У чуй буге эдембу нуьвуйсде.

— Нуьшит, — гуфди заведующий, сере гьово невегуьрде. Песде э тигьэтевоз денишире э дироморегор, пуърси:

— Чуй гьууллугьи ишмуре?

— О..о..о, бэхшлемиш сохит. Ме ишмуре э хьисобевоз инжимеиш сохдем? — пуърси дироморегор.— Орешкови фомилейме, сиротчинуъм... э дигь зигьисденуъм.

Сиротчи де гоф несохд, дениши э бешгей э маладевоз билесумор бугьо мэхьсой хуьшде. Песде ведешенде эз жиб пинджек, э зерд бире куьгьне гозит пучунде оморебугьо документгьоре, но э пушой эн заведующий.

— Мере патент вегуьрде воисде...

Сиротчи эз гьуьмуьр чуьл сала зиьдте нибисдо, оммо у пире мерде хуно веде бирембу. Сипре муйгьой энукидан ченд мегьиш шуне зере не оморебуге, пинджек не шовол ю гириге гьэд-гьуд бу. Вини ю вамасире бу, гьирмизи бу, сифет ю шулдуре хуно, эз пиьнискеи. Десгьою эдембириуьт лерзире. Веде буки у эзи лилову недерие керггьоре хуно уре не хуней, не мескен.

Документгьой юре фегьм сохде бэгьдо, заведующий гуфдирени:

— Бурайт э ён инспектор, ме ихдиёр мидуьм ишмуре патент эри доре...

Сиротчи денорени документгьоре э жиб пинджек, вэхуьшдени, оммо эз жигей хуьшде нисе жуьмуьсде. Э лерзире десгьоревоз гьэд-гьуд сохдени куьгьне шляпай хуьшдере, эз е пой э у поиге поисдени, евош суьвруьсдени э муьшд дес.

— Ме эхи хуьшдени ме оморем,— эхир э мэхьнефиревоз денишире э заведующий, гуфдирени сиротчи.— Э дуьл дузиревоз. Оммо гьеме мере хуно нисдуьт. Угьониге эз финотдел пэхьни биренуьт! Оммо угьэ э ме мешет мибошут.

— Кигьо? — пуърсирени заведующий, е верэгь когьозе э пушой хуьшде кешире эри нуьуьсде

— НәгI — о! Ме эз у товне нисе гуьфиренуьм, у езугьлуьре хуно хэндуьсдени.— Дануьсденитугьовир заведующий, чуьниге. Э дигь иму кене сиротчинуьм дери, оммо... гIэйб оморе мере эри гуфдире...— Ме дануьс-

денуым, ишму миварасит, эз товней ме нисэ гуфдирёнуым... Ме гъечиш зигъисде мидануым. Э гъонун гуьре эдем гуфдиренуым. Хъэз оmore кимигъоре э гъонун хъуькмет гъэришу рафде, дуьзди сохдэ. Э метелегъо гуфдирени: «Гуьмуьр эн дуьзд кутэхьи». Биреш гъечу бие бу. Расди гоф ме? Ини, меселен, Михайлов.. хьи.. хьи.. хьи..

Сиротчи некруым-некруым хэндуйсдени, песеде э лерзире десевоз ведешендени эз куьф ейлугъэ, покурдэни эрэгъ гъуьж диреморе сифет хуьшдере.

— У шубкести, чубугъиш дери э дес ю, сммэ гене динж нисе поисде, гъурумсогъ! Эз и гъейсэгъэтинэ одмигъо сер ме нисе ведарафде! Гъемише нэгъ, оммо гогъбир сиротгъо зерени... Оммо э финотдел оmore мэгълуьм нисе сохде ю сирот зере гуфдире.

Заведующий, сере гъуз гуьрде, чуй буге эдембу нуьвусде. Сиротчи, э гуш-гуши гуюгъоре хуно, гене эдембу гуфдире:

— Мере гъэйбиш оморени... Ишму э е одомиш кикуит, ме э ишму?.. Ме э хотур ме нисе гуфдиренуым... Ини, екигеш, механик эн совхоз иму, Юлдашев... Хьи.. хьи.. хьи... Гъэйллегъоре кура сохдени, сирот зере. Э гъэд хэлгъ сес дери, егъни, у эри сиротгъо пул нисе вегуьрде. Ки бовор сохде э у гофгъо?! Е гиле гъечи, э вогънеревоз, ме эз у мугум: «Туй гъэйлгъоре пулсуьз эри чуй сирот зере?» И гъечи, чумгъоре чарунде, э мэдениши, мугуиге бебей эн игъоре ме куьшдем. Песеде гуфди: «Чуй элчэгъэ одомини туй, Орешков!».. Хьи.. хьи... Эз расде гоф хъэз нисе оmore нелоигъэ! Мере воисдени: мере патент бире бэгъдо угъоре негъилит сирот зере, не э пулевоз, не э гъовои.

Заведующий дуз сохдени галстук хуьшдере, норени гъэлемэ э гъирогъ, тиж, тигъэтлуь дениширени э Орешков. У песово доре-доре хуьшдере, рафдени э лой дер:

— Бэхшлемиш сохит, кидан егъэлмише гоф гуфдируьмге!..



ПУЧЕ ЗИНДЕГУНИ

Э з расдиш, дуъл инсон э торике мугьоре дери, дирешинохде нисе бире. Согъ гӀуьмуьр мизигьи, муьнуьк хьэрмэхьиш мухури, оммо гене бегьем нишинохи юре... Гьечи гуфдиреинжо... ихдилот сохумгьо хуби.

И гьозие-гьэдер э сер пире зен, хоригьой хьэет имуре жару зеренигьо, холей Басмат омори. Гуфдире нуьт у э жогьилигьой хуьшде омборе раче сер бири, юш бие зен, э шуьвер рафди э е гӀошире пире мерд. Е сал бэгьдойге гьишде эри холей Басмат соворе гӀэилле, пире мерд рафдени э ён рэхьметлуье бебешу...

Зигьисдембу холей Басмат э эхир дузе жевгьлуье куче, э е чуькле утогьле. Дуьрлуьг холей Басмат бу: е куьгьне кровать, чуькле шкаф ве е чуькле гиргине стол. э сер комики у чи хурдембу.

Хэржи эн у диеш селигьэлунь бу. Холей Басмат эз базар гешде мивосдо лап ужуге чире: хьэле помодуре, буй гуьрде силодкере, гушде гириге у эзи нисону, те и нисону овурдембу. Е гиле у хуьшдере омбор нифри сохдебу, эри эз базар пени восдореи, э магазин ужугте биреки жиге. «И хэре сер мере дениш ебо, фугьунде-фугьунде гуфдирембу у э хоригьой кучере жару зереки, — хок э сер чуь мени хэре сер, гьечу мибу дие... недауьсдем.» Оммо эз партал гье эз дури шинохде бирембу уре. Вокурдембу куьгьнее пелуь-пелуье партал ве э сериш бссдембу снегье косинке.

Сэгьэти юре дануьсдембуьруьт. Кими вэхд э зарифетевоз эз у мицуьрсируьт:

— Э хьисобевоз, Басмат, ишму хэйли пул кура сохдейт?

— Кура сохдем? — пуьсирембу пире зен. — Эз же? Эгенер мере пул мибисдоге, ме гьечи мизигьисдуьм бегем? Ишму гьечи фикир сохденит ки, егӀни, холей Басмат тэхьнси, чуь хэржини уре? НэгӀэ, холе гьурбун

ишму. Тэхьно гьисдуймгеш, кеме хэржи нисди мере. Гьер руз, гуом, е бухэнке нун миё бу, е десделе савзи гереки, шекерле гереки, нефдле-спичкеле гереки, гьеле эз у хэржигьойге гьэйри... Пушотегьо, э согьинде Довид кук ме, э жигей хуьшде мелерзо, сери-тени мере восдорембу э вэхдию, оммо имогьой кини мере.. — е гурунде ох вокоширени эз кон дуьл, э соегь эн у одомигьо, мол-девлет вир сохдетгьо. Песде, хэйли бэгьдойге, холей Басмат гуфдирени.— Ишму э хьисобевоз гуфдиренит, егІни, холей Басмат пул пэхьни сохде. Эз лэгІшму мишинову эз и дуьздгьо-хэспушгьо, бовориш мисохут мере пули гуфдире. Негьогьие хэто миёрит э сер ме, хубе кор нисди...

— Бегем ишму эз дуьздгьо терсиренит? — э хэнде-ревоз пуьрсиренуьт гьуншигьо.

— Де чуй мисоху пире сер ме, эз дуьздгьо не терсире? — жогьоб дорени холей Басмат.

Эз расдиш, чуй кор буге, у эз дуьздгьо омбор терсирембу. Гье эз соей шохьонгум, хэлгь э куче сейрек веди биренге, холей Басмат сэхд сохде летгьой пенжерере, песой гьили юре веноре, дереш гьили веноре, минуьшд э хуне.

У э кор э вогьнеки дарафдебу. Холей Басмат эз дворники гьэйри, э е коригеш муьхшул бу, мэгІмелечи бу. МэгІмелечи бирей эн уре дануьсдембу гьенжэгь е одоми-долол, эз дес комики гирошдембу кор эн у.

Гелуьр эн у бобот бу. Гьер орине, шевгьой екшоботгьо, нуьшде э пушой стол, э сер комики дегесунде венорембу лампей пенжире, гьуз гуьрде пире сер хуьшдере, хьисоб сохде дечирембу пулгьоре жере-жер э селигьэревоз, туьме-туьме сохде, гьэд сохде донорембу э туморелей сатини, комики рузгьо дебирембу э герден ю. Шохьонгумгьо, эз кор оморенге, холей Басмат пэхьни мисохд туморелере э гьэриш пилете.

Холей Басмат, рази биренге эз оmore мэгІмеле, э кор ведиреморембу руе хэнде, кореш э селигьэревоз

мисохд, хьээтгъо не кучере э тигъэтевоз жару зере, э гIов-гIэилевоз зарифет мисохд. Оммо у орине гелуър ю кем мибисдоге, у э екиревозиш гоф нисохд, коре гириге недуъл-недуъл сохде, е жигере жару зере е жигей-гере гье гьечу мигъишд.

Ижире оринегъо чиш бегъем нихурд: себэхь-шо-хьонгум. Согъ орине э ох-уф мидебисдо.

Гьербо пушой хисире, холей Басмат, чуймей сер пилетеире вегуърде, э мугъоети ве э тигъэтлуъиревоз мивегуърд туморере, туър-туър сохде мидено э бонилей хуъшде. Кими вэхдгъо, шевгъо хэбер биренге, у гьелуъсди десе доноре э зир назболуш бонилей хуъшде мигешд уре, эри дуъле жэгIми хуъшде. Шевгъо у эз дуълпесои дирембу ченд жире ховгъо. Эз хуне вадарафденге, гъич е дэгъдэгъэш фурмуш сохде нисе дануъсдембу чуйкле чейтенлей сатинире.

Пулгъо дегиш биренге, холей Басмат пулгъоре дегиш сохде э тозе садигъоревоз, э мугъоетиревоз, хьэйф оморэ эри гъэд сохде, дечирени э чейтенлей сатини, ве пэхъни сохдени э доруни жиб хуъшде, духдебугъоре эри олхоини дуъл хуъшде, э сер сине.

Лап бежид гье э куче е небуге э кесевоз э гоф сохдеки, дес ю э дэгъдэгъэю ебо вемундебу рафде э сер сине. Оммо пире зен диренге, э юревоз гофсохдегор де-ниширеире, гьелуъсди сер мигуърд хуъшдере эри хорусде. Оммо гене е ченд вэхдиге бэгъдо дес ю гене мивебисдо э сер тумореле.

Е некумие белогъ оморени э сер холей Басмат.

Руз орине бу. Хьээте жару зеренге, пире зен, гIэдотире хуно, комиреки терг сохде нисе дануъсдембу, десе кеширени э сер жиб хуъшде, гье еки перт бире мундени дес ю э сер сине вери. Ранг сифет ю рафдени эн у жире одомигъоре хуно, комигъореки эз некуми гуърдени дуъледерди...

Чуйкле чейтенлей сатини э жиб не дебу. Суьфде холей Басмат ю э хуъшде бовор несохд. Е ченд бойгеш

пес-песоеки дес зере бэгъдо, эз мэхътели хуышг бирени мунде.

— Эз расдиш вир бири? — фикир сохдени холей Басмат.— И чуйтам бире кори эхи? Э куыфиге дено-ремге?

Дес юре гъилинже вор гуърдере хуно, сер гуърдени куыфигере эри гешде, э комики дебу е ченд гъэдер хуърде пул, комиреки норебу эри хэржи хуышде. Оммо чуыкле чейтенлей сатини недебу.

Пире зен э хуышде диреморе нисе дануьсдембу. Лап хуб э ёр ю бу себэхъмунде чейтенле э жиб ю дебу, э хьёте не кучере жару зерекиш... эри, эри лап хуб мунди э ёр ю.

— Белкем ме егІэлмишуьм, э хыисобевоз ме уре э хуне фурмуш гыишдем.

Эри эн у гъечи омоки, гуйге чейтенле э зир назболуш бонилею дери. Э и фикиревоз, э лерзире пойгъоревоз, диреморени э хуне, нефес ю гуърде-гуърде вокурдени келе килите, дарафдени э хуне. Суьфде-суьфде холей Басмат рафдени э ён кровать, зир бонилей хуышдере эри гешде. Зир эз эрэгъ зерд бире назболуш тигъи бу. «Э же офдорибу и?!...» Сер гуърдени эри гешде зир нимдере, гье белкем эз зир назболуш суьруьтлеме рафде дарафдиге э зир нимдер. Зир нимдере хуб фегъм сохде бэгъдо, у мэхътел бирени мунде.

«Э зир кровать офдоре чи бириге?» — э и фикир имид дошде, у гъелуьсди гъуз бире, нуышдени э сер дуь сугъре зани, сере доноре э зир кровать, ведешендени эз унжо куьгъне, жундуре чемодан, дуьмсуьзе чойник ве е хэйлиге журт-пара. Оммо чуыкле гъовлугълей сатини недебу.

— Э же мидануь сур бире и? Мэхътеле кори! — е ченд бо гуфдире холей Басмат, покурдени э чуьлкине ейлугъэвоз эрэгъ эз пири гъуьж диреморе пушони хуышдере.

Дуьл энү омбар бил-бул бире.

— Эхи хьэёте жару зере бэгъдо у э сер синей ме вебу, — фикир сохдени пире зен, генеш эри дуьле жэгми хуьшде гешдени гьеммей хьэёте, кучере, е ченд бо зир-зевере гешде, поисде ве гешде жигей хуьшдере. Песде рафдени э ён ешиг хокору, «чуь мибу дануьсде, белкем жару зере шендемге?»..

Имогьой хэйли вэхдиш мибисдо ешиг хокору шенде не оморебу, эз буй мерг э куьнди эну рафде нисе бирембугеш, холей Басмат куьнд бире, сер гуьрдени эри гешде. Ю, холей Басмат, дануьсдембу инжо вир не сохдеи гъовлугъэ, генеш эри дуьл олхоини хуьшде, эз и омонети хуьшдере вир сохдегоргъоре хуно, у гьеммей ешиге, хокоруре пес-пес сохде эдембу гешде.

— Чуь вир бири, холей Басмат? — пуьрсирени гъунши, комики гьеммише, э зарифетевоз веровунде сер гофе, ёгъинире дануьсдембу.

Оммо пире зен не гуфди чуь вир сохдиге эз терс нум ю э шегьер лов бире, гьеме руьхшенд мисоху гуфдире. Ве екиге, ки бовор мисоху, э ю, косибе зен, вир сохди гуфдире е бегъеме омонетире? Мигуют, серсон бири э вэхд пири хуьшде. Уне гуьре омбор фикир не сохде, жогъоб дорени:

— Не динже гІэилгъо хокендаз мере инжо шендет...

— Гъо-о-о,— хэндуьсдени гъунши.— Эжеб мерди-мазаргъоют.

Те торики шохьонгум гешд у. Гъовлугъ гъич э е жигеш ве ди небу. Лап торик биренге, холей Басмате е виж венорени, лап эз хуьшде визор бире, эз и гиснее одоми э пушой герме гІош нуьшде, оммо эз дендунедерди хурде нисе дануьсденигъоре хуно. Оморе-оморе виж жендек ю бирени гужлуь, чаруьсдени э дендунеково. «Чуь сохум, чуьжоре гердуьм». Гьемме жигере гешди у, эхирде холей Басмат гъэриш пилетереш гешдени: чуь мибу дануьсде, белкем унжо дери? НэгІ, не дери. У дие негешде жиге не мундебу.

Вемунде-демунде, хэсде-менде, э дуьлесди э сер ю оmore тенгиревоз, партал не векенде, пире зен офдорени э сер кровать...

* * *

— Чувниге холей Басмат сур бири имбуруз,— э мэхтелиревоз пуьрсирени мерд гъунши эз зен хуьшде.— Бура виниш гъери чув сохдеге у унжо...

Зен дере куфдени:

— Э холей Басмат, холей Басмат! Вэхизит, вэхд хъёте вечирей!

Екиш жогъоб нисе доре. Гене куфдени зен, песе гъуншигъойгеш. Гене жогъоб нисд.

Эхирде дере э гужевоз хуьрд сохде дарафде диренуьт, холей Басмат дегешди э хори. Муьрди. Э ён ю, э гъэриш жундуре назболуш ве жуьле-жундуригъойге офденуьт чувкле гъовлугълей сатинире. Сигъ дечире оmoreбу чувл доне тозе садигъо. Гъуншигъо, лоле хуно, бисдорут мунд...



КЕГЪРЕБОЕ ХУШЕГЪО

Эз герми руй эн хори гуйге гъобогъ дореду. Руй энз эзир пой одоми жэгъ-жэгъире хуно эдембу жигъ-жигъ сохде. Чувшме эз лой дерьёгъ ведиреморе эдембу уьшуьгъ, герми хуьшдере лов сохде э гьер тараф.

Ме гье и вэхди эдембируьм эз ён онгурбогъгъо гирошде. Хушегъой эн онгур генилегъой эн кегъребоире хуно дуллу бируьт эз лувгегъой эн тегъенгъо. Э угъо

денишире, ме эриме фикир сохдум: хушегьой эн онгур э тегьер инсонгьо жуър-бежуърют, оммо чуьшме э тегьер эн деде э балагьой хуьшде э е дуьл, э е чум дениширенигьоре хуно, гьечу гьемей энугьоре тен, боребор, уьшуьгь ве герми хуьшдере доре.



КЕЛЕ МЕРД

Паровоз буьруьж зере гирошд, бужу сохде сокити эн себэхьмундеире. Ме э пушой ме дируьруьм балай эн е мерде. У э тегьнимиревоз, тэгИди не сохде эдембу рэхь хуьшдере рафде. Ме тен бисдорум э уревоз, денишируьм э сифет эну. У эз гIуьмуьр е огьиле одоми бу. Сифет ю эз пири гьуьж диреморевугеш, чумгьою тиж бируьт. Эз зир э мазутевоз чуьлки бугьо шопкей эну ведибируьт сипре пигIогьой эну.

— Себэхь туь эхэйр бу, леле! — гуфдируьм ме эз у.

Огьиле мерд тиж дениши э ме.

— Эгьуьбет туь эхэйр бу, хэлефме!

— Гьечи себэхь зу-сери ишму э же рафденит?

— Э кор... э кор эдее рафденуьм.

Огьиле мерд е кем э хуьшде домунде, гене дуборе э тигьэтевоз денишире э ме, мугу:

— Ме пенсионеруьм. Согь гIуьмуьрме э рэхь мошин кор сохдем. Э келе хьурметевоз мере корсохгьойму э пенсия фуьрсорет... Е мегь э хуне домундуьм. Хьэёте вечире, темиз сохде, э жиге овордуьм, оводу сохдуьм, гьомборе гьуьч сохдум. Дие де кориге небисдо эри сохдейме. Ме э кор вердише одоми, корсуьз гьэрол негирдуьм э хуне. Ме гьемише э зенмеревоз э дусди, шолумиревоз зигьисдем. Имогьой эз битоби дуьлме, эз корсуьзи э зеневоз офдорем э гофе-гоф. Ме

эриме хэёл сохдум: нэгI, гьечи кор гIэмел ниёв, чорей сер мере биё офум... Эхирки, гуом э туь, имогьой ме гене рафденуьм гье э пушотеине корме...

Мерд е минут поюнд гоф хуьшдере. Песде лов энү э шоре хэнде верафде, э ёр ю е хубе гоф оmore одомире хуно, сере тик гуьрде, мугу эз ме:

— Дие согъ боши, хэлефме, ме э кор ме оmore расирем...

Отгиле мерд гье усэгIэт чаруьсде э улойге, душгьой хуьшдере тик гуьрде, жогбиле одомире хуно пой вечи бежид. У гьечи эдембу рафде, зури-зури, эз кул гуруне шеле фураморе одомире хуно, э шори, э ники эн дусд, эн шинох буравгьоре хуно...



НЕСИГИЭТ

Е руз э е шинохе кукевоз, э рэхь мошин кор сохденигьоревоз, эдее ихдилот сохде-сохде эз эевер шегьер э зофру фурамореним. Гье и вэхди эз ён иму е келе зен, сипре муйгьо, лэгъэре сифет, хим-хуьшг, ним-назук, поере хуно, эдембу гирошде. Э дес эн келе зен е келе пура гъэрзинке дебу. Гъэрзинке ингъэде гурунд бу, у гогъ э и дес, гогъ э у дес эдембу берде уре, гъэд бире-бире. И шинохе кук келе зене э и гурунде гъэрзинкеревоз диремунде, гье усэгIэт омо э ки энү, вегуьрд гъэрзинкей энуре эз дес ю.

— Эритуь гурунди, холей Несбет, ди ме миберуьм шелейтуьре,— мугу кук эз келе зен.

— Э—э—э, инжимиш мебош, хэлефме, ме миберуьм,— некруьм-некруьм гуфди келе зен, гъэрзинкере доре.

Е гъэдер рэхъ рафденге, бирден келе зен дес кеши, э лой эн гъэрзинке.

— Э куьнди эн хуне оморем расирем. Дие имогъой ди ме беруьм, инжимиш мебош.

— НэгI?,— мугу шинохэ кук,— те гъопуй хуне расире ме гъэрзинкере э туь нидуьм.

Э лэгIэй гъопу оморе расиренге жовоне кук до пура гъэрзинкере э келе зен. У э хъэът дарафденки эз шинох ме пуьрсируьм:

— И келе зен гъуншитуьни?

— Эри,— мугу кук.

— Хубе одомини?

— Эз же омори!.. Лап беде зени. Зугъун мари-эбрэгъи вери уре. Гъемере эдее нифри-гъэзовоти сохде гешде, хуби-шори эн екиреш нисе хосде.

— Дие эйчуь кумеки сохди туь э ужире одоми,— пуьрсируьм ме э махътелиревоз эз шинохме.

— Эвелимуьнжи,— мугу у,— холей Несбет келе зени. Э келе одоми хъуьрмет гуьрде гереки. Ве дуьимуьн, мере воисдембу э и коревоз э дуьл энэ эри гъиругъдеки рэхъм венгенуьм, зугъун хуьшдере эри хэлоигъ тэхъл несоху, эзи хубе корме эри хуьшде е кемлелей семе не-сигIэт вегуьруь, гIэйб биёв уре эз усоле хосиетгъо, беде зугъун хуьшде.



МЕРД НЕ КУКЛЕ

Е руз эдембируьм эз ён эн онгур богъгъо гирошде. Пушой эн онгур чирегъо бу. Рузиш лап герм бу, чуьшме гуйге эдембу гIэтош тигъи сохде э хори. Е си-чуьл метро эз ме дурте чордогъ эн гъэреулчи веди бу. Бир-

ден мивинуым эз гъэд эн богъ е мерд не гІәил, пура туморегъо э кул ишу вери, иловлере чуме-чару сохде, эдете ведиреморенуыт эз гъэд богъ. Эз зир туморегъо, э кул эн угъо вебируытгъо, эдембируыт дугъ-дугъ, гІәрс эз чум рихугъоре хуно, шире рихде.

Мере всисдембу зенуым гирорум, оммо э сифет гІәил денишире, поисдуым. Сифет эну эз герми гуне дореду. Эз эрэгъ тар-гІов бу. Веди бу шеле эри эну омбар гурунд бу. Сиегъе чумгъой эн гІәил гІәйбе-гІәйб ве эн гІо-си бире одомире хуно дениширембируыт.

Мере э гІәил езугъ оmore, мугум эзу:

— Шелей туьре ди э ме беруым.

ГІәил суьфде недуьл-недуьл, песде рази бисдо. До э ме шелей хуьшдере. Е кем рэхъ рафде бэгъдо, пуьр-сируым ме эзу:

— Эз богъгъо оморенит?

Э жигей эн гІәил жугъоб до мерд.

— Эри, онгури..— песде суьпле хэнде сохде, мугу,— екем э пэхъники чирейм, гІәмел сохдейм...

Ме энжэгъ гъейсэгІәт верасируым, э шелей энигъо деригъо дуьздире онгургъои гуфдире.

— Нисе терсиренит? Оmore гуьрдге ишмуре. Гъеми ишмуре эри эни кор тембихъ мидуьт, гъемиге биебур мибошит э пушой эн хэлгъ.

Мерд гене суьпле хэнде сохд.

— Гуьрдгеш мигуьруыт. Гъэреулгъо омбари. Оммо гъелелуьге, коргъой гуьгъоре хуно, э чум садан расд не оmoreйм.

Эз гофгъой эн мерд ме верасируым, ки у э гІәилевоз суьфдеи гиле нисе оmore эри онгур дуьздире. И гофгъой энуре шиниренге мере омбар гъэгъер омо эзу, хуни-хуни денишируым э мерд. Туморей эн онгуре э хори норе, мугум эзугъо:

— Вегирит ишму берит шелешмуре.

Мерд мэхътеле хуно поисде, мугу эз ме гъечи минет сохдере хуно:

— Вомундей? Гъэйгъу нибу, екемлейгеш зэхьмет кеш, бер те шегьер, пул туьре, муьзд туьре ме мидуьм.

У гье усэгІэт дено десе э куьф, ведешенд е гъэм пул, песде эз гъэм эн пул е гъэд-гъуде монете вегуьрде, кеши э лойме. Ме дес энуре песово шенде, деш гІоси бирере хуно мугум:

— Туь хуьшденитуй веги бер!

Ме денишируьм э гІэилле. У сере гъуз гуьрде поисдебу. Ме эдембируьм дире у гІэилиш буге омбар гІэйб, хижолети эдембу кешире шиновусде и гофгъоймуре. Веди буки гъич эз дуьли энубеу бешу уре э хуьшдеревоз э богъ эри онгур дуьздире оворде гуфдире.

— Э гІэил семе ёзугъ биёвгу туьре. Эри энубеу и шеле гурунди, зэхьмети,— мугу мерд эз ме.

— Туьре э гІэил езугъ, рэхьм оморениге, дие эйчуь берде уре э хуьшдеревоз хуте сохде э дуьзди-дургуни, уьсделуьге э кул ю ижире гурунде шелере веноре? — гІоси бире, гуфдируьм ме.

Эз мерд дие гоф неведиремо. Мере э гІэил езугъ оmore, шелей энуре венорум гене э кул ме. Те шегьер расире иму оморим гъич гоф несохде э екиревоз. Э куьнди шегьер оморим расиримки, гІэилле куьнд бисдо эз ме, мугу:

— Дие имогъой ди ме беруьм. Омбар согъ бошит!

Ме шелере э дореки денишируьм э сифет эн гІэил. Чумгъой энубеу гъэмлуй бу, келе пэхьникие дерд э дуьл дерие одомире хуно.



ГІЭЗИЗ

Э куьнди дерьёгъ э е жерге эдсмбируът вероморе жогъиле дорлегъо. Гъемей энугъо эз е жинс бируът, э е руз кошде оморебируът. Оммо угъо дуь э еки ухшеш нисе зерембируът, дуь эз еки бешгъэ бируът. Е дор эз жерге хуьшдере ён дорере хуно, гъуз бири э ело. Дуьимуьн дор, э ён боруй сенгъи вероморембугъо, бонгъузе хуно гъэд биребу. Бору уре сигъмиш сохде, гуйге нисе гъишдембу уре вероморе, э сенгъгъой хуьшдеревоз гъэрмэгъ, гъэлпелуь сохдембу гъобугъ энуре. Кими вэхд гъечи оморембу эри одоми, ки и дор нивотову гуж эн боруй сенгъире, эхир-эхириш борж берде недануьсде э гуж энугъо эз гъувот бурра миёв, хуьшг мибу, хуьрд мибу. Оммо э четиниревоз вероморембугъо дэр, гъеме гуж, гъувот хуьшдере кура сохде, сэхд, муьхъкем поисдебу э жигей хуьшде. Борж берде эри зиндегуни хуьшде, у гуйге руз беруз эдембу гужлуь, гъувотлуь бире.

Эн сеимуьн доре бирэхъме дес эн кинигъ велгъгъоюре туьр-туьр сохдебу, луьгегъоре — гъэд. Оммо уш жигей хуьшдере сэхд гуьрдебу э жергей эн доргъо.

Оммо э Гіэрей эни доргъо е дор дебу: гъуьндуьр, рач, назук, юш вераисде назуьшменде Гіэруьсе хуно. Доргъойге э пушой энугъо бухуре хуно нушу дэрембируът. Гъеме э богъче гешдегергъо э у денишире томоше мисохдуьт, у гуйге эз гъеме доргъойге э пушэй энугъо Гіэзиз, вегирлуь бу.

Е руз дерьёгъ туьнд бире, хуьршлуь шаргъой хуьшдере зере шендени э сер эн жергей эни жогъиле доргъо. Эз гуж эн шаргъо, доргъо эдембируът гъэд бире, ноле зере. Оммо еки энугъош хуьрд небисдорут, муьхъкем поисдуьт э жигешу э жергей еки. Энжэгъ казуке, назуьшменде раче дор, э шивеневоз дуьгъэди бире, хуьрд бире, офдо э хори, эз некуми куьшде омэре одомире хуно, неветовусде гуж эн шаргъой дерьёгъе.



ГЪУШ НЕ ОВЧИ

Э гъуьндуьри догъ, э сер е келе раче палутдор, веро-моробугъо э гIэрсй чэж бире жигей эн келе дохьори, эри хуьшде луле гуьрдебу суьмуьргъ. Э зофруй дохьори, лап э пойнею, маскен зеребу е чуькле дигъ.

Э зофруй эн дигъ чеменлуь-савзелуье жигегъо бируьт. Унжо эз себэхъ те шохьонгум гелей гусбендгъой эн колхоз хорунде сморембируьт. Сер ебо чупонгъой колхоз гелере ведировунде э чул эри хорунде, гъуш эз лулей хуьшде ведиреморе, фирегъе гъэнетгъой хуьшдере лов сохде, мигешд э гъово, э сер эн геле. Оммо у э е доне гусбенд, вере саташмиш нисе бирембу. Егиле шохьонгум, э сер эн геле гъов кенде оморуьт е суру гуьргъо. Гъуш угьоре диренге, учмиш бире оmore э сер энугъо, сер гуьрд гуьргъоре э тиже гъэрмэгъгъо ве дундугъ хуьшдеревоз эри пара-пара сохде. Гуьргъо терсире, яралуь-гъэлпелуь вирихдуьт, гусбендгъоре олхогъин гъишде. Оммо суьмуьргъ юш е гъэдер яралуь биребу эз дес энугъо. Чупонгъо вепичирей гъуше э гуьргъоревоз диренге омбар мэхьтел мундуьт.

Бэгъдовой ченд рузиге суьмуьргъ гене веди бисдо э гъово. У и дес лап гъуьндуьр бежид черх хурде нисе паруьсдембу, пушотейнегъой хуьшдере хуно. Веди буки, эз э гуьргъоревоз женг гуьрде айло у гъеле бегъем э хуьшде, э гъувот недироморобу. Чупонгъо диренге уре шендуьт тикегъой тозе гушде, ишу рафдуьт э гъирогъ. Гъуш асда-асда учмиш бире фурамо э хори, зурри-зури э гъэрмэгъгъо-дундугъ хуьшдеревоз пара сохде тикегъой эн гушде, хурд. Песде гене пар зере верафд э гъово.

Эз у рузевоз суьмуьргъ гъемише э сер эн гелегъой колхоз сар фураморе черх зере мигешд, ве гъэреулчире хуно уёгъ денишире э сер эн геле гуьргъо неёвт гуфдире.

Чупонгъош уре диренге, гье усэгІэт тикегъой гушд эн тозе куыште моле мишендуът э пушой энун. Гьечи э гІарей эн суьмуьргъ нен чупонгъо офдорут дусди, боворини, ихьдибори.

Е гиле е овчи оmore ведиремореву э и хоригъо. У руз э ов энун гьичиш не офдореву. Овчи гуйге эз товун эни кор гъэгър вечиреву мунде. Бирден э чум энун вохурд суьмуьргъ гьечи сар, э олхогъини, бовориниревоз паруьсдембугъо э куьнди одоми. У эри хъэз хуьште туьфенге эз душ вегуьрде зе суьмуьргъэ.

Гьич э дуьлгъо-хэьлгъой эн гъушиш недобу уре одоми зерегор мибу гуфдире, э ники энун беди сохдегор мибу гуфдире. Гъуш гьетте яралуь бире, вешенд хуьшдере, гуйге эз хов терсире, хэбер бирере хуно, тиж, э охмури, серкуширивоз дениши э овчи, мугуиге воисдембу гуфдире уре: «Чуь тэхсирме бу?» Песде гъуш песини гъувотгъой хуьшдере кура сохде, эз яралуье синей ю хун эз лилову гІов рихуьгъоре хуно рихде-рихде гъов кенд верафд зверо, дие гьич эри невогошде э лой эни боворинсуьзе одомигъо. Бирден у эз гъувот бурра, дуьл ю поисде, сенгъэ хуно офдо э хори.

Чупонгъо видовусде оморут эки эн овчи, нифринэгІлети сохде уре, восдорут туьфенге эз дес энун.

— Эйчуь ишму э ме ижире охмури зеренит эри эн е гъуш. Меш ишмуре хуно одоминуьм, инсонуьм. Бегем гъуш эришму эз одоми дусдтеи, гІэзизтеи?!

— Эз е пара туьчуьни лоигъсуьзе одомигъо, — гуфдируът чупонгъо эз овчи, — гьелбет ужире гъуш сад пой хуби, верзирени...



БИЛОГЪ

Рэхъ giroшдени эз ён сейреке чуюкле више. Оммо тенге пичире-пичире жилгъэле бердени э лой хунчелуьэ пире палутдор, комики муьхъкем э раггъой хуьшдеревоз сэхд гъэл гуьрди хорире. У гуйге ён ведоре, эдее гуш дошде мэгІни эз зир раггъой ю рихденигъо зуьм-зуьме гІов чешмей билогъэ.

Эз у чешме сер не зере ве эз серине гІов ю не гьенжире е рэхъгирориш нигирору.

Еки эз хьовиргъойму э пушо офдо ве куьнд бире эз чешмей билогъ, зуьм-зуьме гІов юре эз кеф дес гьенжире гуфди:

— Ох, чуй рачи чешмей билогъ... Гуйге жуниш рэхъэт бисдо!

Э ён ме нуьшдебу е жовоне кук, Рафоил. У э дуре сэхьро чум деноре, муьхшуьлет бу э фикиргъой хуьшдеревоз. Бирден вэхуьшденге эри рафде, евошлей дуьл хуьшдере вокурде, эз ме гуфди:

— Эдем э ён учитель рафде, э гъуншиму гьисдигъо дигъ.., меслэхъэт эри вегуьрде.

Песде у ихдилот сохд чуьтам соймиш бириге э е гъэрибе духдер, комики омори эз Ростов. Е сали эдее хъэрекет сохде, оммо пире бебе-деде рази нисдуьт уре эри хосде. Чуй хубе фикириге э ёр ю оmore, бирден ловгъой ю э хэнде верафде, у гуфди:

— У учитель гъуллугъ веровуне одомини...— Ве эри тогІини гофгъой хуьшде гене гуфди.— Эз гьемме дигъо э ён эну одомигъо оморенуьт...

Рафоил бу очугъэ сифет, фирегъе пушони, сие чумгъо, гъэйгъукеше одоми ве рэхъмедуьл.

Рафоил рафдени. Иму гене хэйли нуьшденим. Чуьшмеш вероморедуьбу э зверсер. Э и вэхди э ён билогъ оmore рэхъгироргъо эз чешмей эн у гІов гьенжире рафденуьт. Оммо гІов не кем бире, не лихъэ. У диеш ми-

бисдо палаш ве зуьм-зуьм мидо. Мигуиге хори хуьшдени ю кешире ведиревундебу мелхьэмлуье гӀове эз лугъонде пэхъникие хэзинеи хуьшде.

Бирден кибуге дес хуьшдере э душ ме вено. У Рафоил бу.

— Рафдуьм э ён учитель... Лап бэхдевер одомини! — шори сохде, бешпингъоли зере-зере, Рафоил рафдени э лой хуне. Гьечи пегьливуре хуно бежид рафдени, гуйге эз зир гурунде шеле хилос бири.

Иму э тигъэтевоз дениширим э лой эну. Оммо гье е гьово эдембу хунде гене мэгӀни хуьшдере зуьм-зуьме гӀовгьой билогъ. Гене э ёр ме омо:

— Ох, чуь рачи чешмей билогъ... Гуйге жуниш рэхъэт бисдо!



ХУЬШГ БИРЕ ЧОЛ

Эз келебейму едигор е чол мундебу — тэгӀрифи гьеммей кифлет иму. Эри ме ихдилот сохдет чуьтам у хэйли жофо кешире, согъ е сал вокурдиге чоле. Оммо э кешире жофогъо верзирение чол бу — лугъонд ве темиз. Гирошдегоре рэхъгироргъо ве гъуногъгъо, гьенжире эз гӀов эну, гьеммише мигуфдируьт, тэгӀриф доре, не хурдет гьич ижире гӀов ишу.

Эз расдиш, гӀов эн чол руьгъ-руьгъ мидо, лезет юш хуб ве гьемише хиник-жилиде хуно мибисдо. Э тигъэтевоз гъуллугъ мисохдим иму чоле, чуьнки хэйли вэхд дес расдире хуно бу, тейте кей, те е руз эриму билогъ гьовуни гировунде.

Эз у рузевоз чоле э гуш гуьрдегор не бисдо. Хунеигьойму дие эз у гӀов нивегуьрдуьт, эглен мибошут гуф-

дире. Ѓїзилгъош ки мидешендуьт суьфде чуюкле сенгъ-легъо ве песде чуй э дес ишу миофдоге, гуш дошде чуй-жире сес омореге эз глов чол.

Вэхд гирошде-гирошде гьер чигъо эз ёр фурмуш бире. Чолиш гъечу.

Оммо и пушогоъ э билогъэ гъуьч сохдеки иму мундим гловсуьз. У вэхди э ёр иму омо чол. Э хъэфберире-воз ме могъбул дениширембируьм э хуьшг бире чол, комики пур бу мурдали ве эз буй э кин ю куьнд рафдеш нисе бирембу.

Мигуиге инжо е кориш нисди, энжэгъ межбур сохдени имуре екем эри фикир сохде...

Гьер чире э зиндегуни гъисмет юни, унегуьре чолиш, у чигъойгере хуно, эз е тараф э зиндегуни одоми ухшеш зере.

Бирени вэхд имуш нисе варасиреним, чуйтам эз ёр фурмуш сохде, э дердгъо-фикиргъо венгесденим дедейгъоре, оммо песде угъо дур биренге кеширеним пешмунире. Ве екиге, гъимет не доре, э гъовой пуч сохденим гуймуьр жовонире.

Дирте, дедейсуьз мунденге, расиреним э пешмуни. Пир миё бошим гъимет салгъой жовонире эри доре.

... Иму глове гъимет нисе дореним те чол хуьшг бире.

ДЕДЕ

Еки-еки келе ве чуюкле дигъгъоре песово гъишде, автобус эдембу э шегьер рафде. Эз пушой чум мигирошд бил зере богъгъо ве бейгъуше хуно бугъо тэхньо мунде пире палутдоргъо — зинде шогъидгъой гирошде рузгъой гъэээгъгъой эн Терек.

Бу ужире руз эн февраль, кей офдои эз зимисту

пэхьни бире вомунде, тигьи сохдени кура сохде гермигьой хуышдере ве э пур бире чуьмегьой эн сибдоргьоревоз э ёр овурде эдей васал оmore гуфдире.

Автобус поисд э е дигь. Пассажиргьо гьерки эз ело, эз герми, пенжерегьоре вокурдуьт. Э ён дер нуышди е раче жогьиле зен. У э дэгьдэгьэю е гиле, дуьлпесово, эдембу эз пенжере кире буге гешде эз гьэриш э ён рэхь поисде одомигьо. Ебойге э лов ю шоре хэнде офдоре, зен вэхуьшдени.

... Гурунд нефес кешире-кешире, теретэгьди, э ки автобус эдембу келемерд оmore. Зен, э пушой дер поисде, хьэрой сохде, огол зерени:

— Бебе!.. Э бебе!.. Ме инжоюм...

— Руз туь эхэйрбу, духдер ме! — э гужевоз нефес кешире, гуфдирени келе мерд. — Екемлейге дир мимундумге, э туь нирасуьруьм. Увэхди мере дедешму э хунеш нидегьишд. Ги игьоре, бэхш эри невей ме...

— Дедей эжи?..

— Эгь, чуь гуюм э туь, духдер ме... Бегем ишму, гьэилгьо, дедее э ёр овурденит? — Песде лугьонд ох кешире, гуфдирени, — нечогь бири дедешму. Телеграмма эз туь оморенге, шор бисдо, э туь дениширебу...

Автобус гене офдо э рэхь. Зен нуышд э жигей хуышде. Э дес ю дебу е десде лезетлуье бубликгьой хуней ве е чуькле гьэрзинке сибгьо. Ловгьою э хэнде верафде, зен гуфдирени:

— Фурмуш не сохди келедедей невей хуышдере. — Песде тэхсиркоре хуно, мугу: — Оммо ме...

Эз зен де гоф неведиромо. Песде, гье ебо, терсунде бэгьвечере хуно, эз жигей хуышде вехуышд ве сэхд хьэрой сохд:

— Хьовир шофёр! Хьовир шофёр! Хосденуьм эз ишму, поюнит машине!..

Автобус поисд. Зен фурамо ве песово не чаруьсде, теретэгьди, рафд э лой дигь. У эдембу э ки дедей рафде...



ШАРГЬО

Д уразе дохьор, ухшеш зерембугьо э зурбое келе кит, жиге гуьрдебу э гъирогъ дерьёгъ. Узатмиш бире э сер гъумгъо, дохьор беседебу рэхъ шаргьоре, мигуиге эз хиники гГов дерьёгъ беисдебу жендек ю.

Тэхьное шар гьовкенде миёмо э сер дохьори ве эз хьюьрш кеф мисохд, шэхдегьой хуьшдере лов сохде э гьерло.

Инжо е кориш нисди. Тэхьное шар нидануь борж берде эз келе дохьори — тэхьное дор гъич э вишеш мегердо. Оммо шаргьо жерге гуьрде оморенге пушово дуь э песой еки, кумег бирере хуно, увэхди е дохьориш пушой эн угьоре гуьрде нидануьт, чуьнки эри еклуьге гъувот дохьориш гъичиш нисди.



ГІУЪЗЕТЛУЪЕ ГЪУНОГЪ.

ВОЗИ СОХДЕГОРГЪО:

О в ш о р — 30—35 сале.

Т е й л о — зен Овшор, 30 сале.

Ю с у ь ф — 30—35 сале.

С о д у г ъ — 40 сале.

Зен ве Мерд — гъуногъгъо, 50—55 салегъо.

Буруни хуней Овшори. Э лой расд — дер, эн доруни хуней, э лой чеп—дер ве пенжере э хъэти. Э ён миглей дивор дивани, э зер диван келе, раче холинче вери. Э миглей хуне столи ве э чор лойюш куърсигъо. Э лой расди дер тумбочкеи ве э сер эню вери телефон. Овшор не Тейло э минутю е гиле, э пенжере денишире, теретэгИди, эдете столе вераюнденуът.

О в ш о р (*е шишере э дес гуърде*). Эжеб хубе шороби, келеймуре омбор хъэз миёв!

Т е й л о (*чонголгъо-лэгъэгъоре покурдеки*). Келей туъ тэхъно миёв, небуге...

О в ш о р. Нисе дануъсденуъм. Э гьеркиревоз омогеш, кошги биёв. Эй ме оmore тэхъно миёв. (*Вегуърде куърсире, норени э юре воисде жиге*). Ме инжо минуъшуъм, Юсуьф — э илойге, туьш ки — э улойге. Келере минуъшунум э ён ме. (*Норени куърси эн келере э ён куърси хуьшде ве покурдени уре э бел тозе пинжек хуьшдеревоз*).

Тейло (*зури-зури эз хунейге ведировундени муь-нуькдекире, денишире э Овшор, хъэрой вегуьрдени*). Туь чуй сожде? Садипенжогь монет дорей, кастум восдорей, туь эдей куьрсире покурде?!

Овшор. Ебо келе оmore, коргьойму э барас биёво. Эзуни садипенжогьго омбор мибу.

Тейло. Пой бура-о-о.. (*Э ёр ю оморени*). Туь нисе шинохде юре?

Овшор (*э пенжере денишире, чарусдени*). Нэг! Юсуьф эдее гуфдире лап бэхдевере одомини. Туьш варас эри туь, зобуне одомире гьич директор ижире келе комбинат минуьт?

Тейло. Туьре дарафде воисденигьо чуй кори?

Овшор. Келей отдел снабжения. Гьейсэг!эт у жиге хэвлети. Эз кормеш гьейсэг!эт чем-чи нисе ведироморе. Юсуьф гуфдики келешмуре шинохденуьм, туьре воисденигьо коре гьуьч мисохум гуфдире, меш гуфдируьм эз ю огол зенуь келере э лойму. (*Вегуьрдени э дес бушгъобе, буй вокоширени*). Эзи ежире буй эдее оmore. Гьери и бушгъобе дегиш сох.

Тейло. Чуй буй? (*Восдорени эз дес Овшор бушгъобе, юш буй вокоширени*). Инжо буй эз же омори?

Овшор (*гъэгъри соегъи*). Дегиш сох екиге дирувун гуфдирум э туь! Гьеле си салигеш зигьисдиге, гене чи сожде нидани. (*Дуз норени бушгъобгьоре*).

Тейло. Бошгу балам, э сер ме хъэрой медеше. (*Ведарафдени. Овшор гене дениширени э пенжере. Тейло е бушгъосбиге дирувунде, венорени э сер стол ве юш куьнд оmore дениширени э пенжере*). Э мерд! Не омоэхи и гьуногъ туь?

Овшор. Хуней бебей Юсуьфе худо вечаруно, хуней мере вечарундге. Филонгъэдер хэржи сождем, имогьой не омоге хуби дие, гьемме сожде хэржигьо пуч — гьич...

Тейло. Гьеле дуь руз зиьдте нисди тозе келе оmore эришму, Юсуьф чуйтам шинох бисдо э уревоз?

Овшор (ловгьою э хэнде верафде). Туь Юсуйфе нисе шинохе, чуй туьлкиниге?! Э шегьер коми тозе хьоким омоге, суьфде э уревоз шинох бире. Э хунохэреб магнит дери дие, магнит...

Тейло (э руьхшендиревоз). Магнит? Магнит е бугьольуе чи нисдики, бура восдо эз туку, туьш дени э куьф. Коми тозе хьоким омоге, туьш бура тониш бош!

Овшор. (эз гъэгьр десгьоре зере эеки). Иш гьечи! Имогьой э руьхшенди туьш мундем! Ме той туь не бируьм, мере той туь сохдегоре худо эз гьугь мазале зено, гьеригьой!

Тейло. Весси-о-о! Меш мугум чуй буге. Туь нихосдиге де мере хосдегориш нибисдо. Гъэгьргьой дургудилобе Юсуйфе эз ме ведешенде!

Овшор. Бур сес туьре эдем гуьфдире, духдер сег! (Рафдени э сер ю).

Тейло. Ой, хьэрой!!!

Оморени сес дере куьфдеи.

Овшор. Эле! Омо! Кидан сес хьэрой туьреш шиновусдиге. (Дере вокурдени). Диройт! Диройт! Э сер чум ме, диройт!

Диреморени тэхьно Юсуйф, дуьлхуьрд.

Овшор. Не офди мерде?

Юсуйф. Нэг! Занигьой ме хуьрд бисдо эз гешде. (Нуьшдени). Э жун туь, Овшор, э хотур туь нибисдоге ме ингъэддер хэсдеире э герде нивегуьрдуьм. Э хотур бирори...

Овшор. Омбор согьбоши! Гьелбет, дусд дусде эйчуьни? Э метелегьо гуьфдирени: «Дес десе мишуру — десгьо руе». (Екем фикир сохде). Э Юсуйф, туь эз зуревоз шинохе келеймуре, небуге?...

Ю с у ь ф. Эри. Имогьой хэйли вэхди.

Тейло. Бэхшлемиш сохит, ме э гоф ишму гъэриш бошум. Э и келей Овшоревоз ишму э хуней еки рафде-оморе сохденит?

Ю с у ь ф. *(бирази)*. Эри, эри...

О в ш о р. Нум эн у сег чуйтами?

Ю с у ь ф. Э зугъун уриси ме уре Саша огол зеренуым.

О в ш о р. Жон Юсуьф, туь инжимиш бош, егилейгеш бура.

Ю с у ь ф. Гене бурам? Егилейге бугу дие. Веди биреники гъисмет эн у мерд не дери э имбурузине суьфре.

О в ш о р *(зен-шуйвер денишире зеки)*. Е бирори сох! Биё гьеркиму е сад грамиш вешеним. *(Зури-зури ве-гуьрдени эрэгъире, декуьрдени, э пейлегьо)*.

Ю с у ь ф. Э расдекиш эз мерд эри гІэйб не оmore, екем хурде хуби. *(Хурденуьт)*.

Тейло. Бэхшлемиш сохит, гене э гоф ишму гъэриш бошум. Ишму зеки хуб шинох биренге, де гІэйб эйчуь оmore ишмуре эз келей Овшоригьо?

Ю с у ь ф. *(Э биразииревоз)*. Э гоф мердгьо зен гъэриш биренге мере гъич хош нисе оmore. Хуб, вэхд эдее дир бире, де ме бурам.

О в ш о р. Жон Юсуьф, хуб пуьрс, дан, белкем э хуней дусд-ошней хуьшде рафдиге.

Ю с у ь ф. Туь олхогьин бош... Энжэгъ мере эз хо-снетгьой хунейгьошму хош неомо.

Юсуьф ведарфдени.

О в ш о р *(э гъэгьревоз)*. Э духдер нелоигъ! Туьре ки гІэжел дори э гоф мердгьо гъэриш боши?!

Тейло. Имогьой шинохдум бироргили туьре! У шилповхур эри е пейле эрэгъи бебешуре эз гьовре мивегуьруь э гьирогъ минуь. У дургу, туь темэхькор. Не шиновусдей э метелегьо: «Дургу темэхькор ми-

фурмуну» — гуфдире. Дуь сал пушо, филонгъэдер пул туьреш хурде, э сереботи энуп эз гъэземет э гужевоз хилос бирей, гьеле уш вес не бири туьре?

О в ш о р. Туь мунош эз у расди! Э меревоз у вэхди Юсуьф нибисдоге, ме рафдебуйруьм чала-чала. Пэтоше хуно, рафд эжеиге гоф сохд, коре гъуьч сохд, омо. Эри е парегьо Юсуьф гъуьч нисе сохдэ беге гьемме коргьоре? *(Екем э хуьшде домунде)*. Расди зурбое пул ве-
дарафд увэхд эз ме...

Тейло. Увэхди гьердуйшмуре гуьрдебу, оммо э пулгьойтуьревоз Юсуьф хуьшдереш хилос сохд. Ме недануьсдем! Мере ингъэдер пул хэржи сохде чуй ге-
рек бу. Кидан, у келей туьре шинохдеш нисе шинох-
деге.

О в ш о р *(э хуьшде домунде)*. Унгъэдер кор нибу. Туь негьогъ мешумор.

Оморени сес телефон. Тейло вегуьрдени трубкаре.

Тейло. Кини? Содугъ? Э гъуьбет туьш эхэйр бу! Чуй хэбери? Маничке э хуне неде бегем? Э хуней дейгьо рафди? Хэйр гердо, чуйни бегем? О-о..., гьечи эри нуьшде. Овшор?..

О в ш о р. Гу не дери!

Тейло. Э хуне дери.

О в ш о р. Гуфдири э хуне дери?!

Тейло. Чуйтам? Оморе воисде? Биё воисдениге. *(Норени трубкаре)*.

О в ш о р. Эле, дери гуфдири?!

Тейло. Де чуй миёсдуьм гуфдире? Содугъ е са-
лиш гьисди э хунейму не омори...

О в ш о р. Туь эй е гофе дургу не гуфдире хуней ме-
ре вечарунде? Имогьой келей ме омоге чуйтам пиш ми-
сохум Содугъэ, гьи?

Тейло. Пиш эйчуй? Уш нуьшуьгу, кес нисдики,
боженэгъ туьни дие.

О в ш о р. Э духдер сег! Эхи Юсуьф гуфдири э хуне де кесиге медебугу, чуйнки гоф сохде нибу. Ме ингъэ-дер хэржи сохдем, кор мере эри барас, овурде, ме имогъой э кин Содугъ нен гъудугъ чуйтам гоф мисохум э мердевоз, гьи?

Т е й л о. Эгенер келей туь омоге ме эз Содугъ мигу-юм э у хунейге дарав...

И гофгъо э лэгIэ дери ,сессуьз диреморени Содугъ.

С о д у г ъ. Шев ишму эхэйр бу!

Т е й л о. Эгъуьбет туьш эхэйр бу!

О в ш о р. (Ох кешире). Эгъуьбет туь эхэйр бу!

С о д у г ъ. Чуйни бегем? Хэйр гердо, ишму суьфре веравундейт?..

Т е й л о. Эри, гъуногъэ эдейм гузет сохде.

С о д у г ъ. Веди биреники гъуногъ ишму лап гьи-метлуье гъуногъи. Эз зуревоз дениширейт?

О в ш о р. Эри, эз зуревоз эдейм гузет сохде. (*ЛэгIэ-паре сохдени*). Ховиш гуьрди мере, шову э гIэруьси би-руьм. Эгенер эз ним сэгIэтиге не омоге эдем дарафде хисире. Эри, коргъо-боргъой туь чуйтами? ГIэилгъо э хуне недеруьт бегем?

С о д у г ъ. НэгI!

О в ш о р. Дере сэхд сохдей оmore? Угъо миёвт э куче мимунутки.

С о д у г ъ. Очоре дорем э гъунши, гъэдэгъэ зерем, Маничке омоге, гIэилгъореш вегуьруь биёру гуфдире э инжо.

О в ш о р. (*э гъиругъ*). Иш гъечи!.. (Чаруьсдени э лой Содугъ). Ме махьтел бирем мунде э ишму, э гъуншигъо очоре чуйтам ихьдибор сохде доренитге.

С о д у г ъ. Туь чуй хунде, гъуншигъойму хубе одо-мигъоют.

О в ш о р. Э-э-э, мегу, мегу, Содугъ. Э ширхур ихь-дибор нисди гъейсэгIэт.

Содугъ. Эхирки, оморенигъо гъуногъ туь кини?

Овшор. Э е келе кор деригъо одомини...

Содугъ. О-о-о..., варасируым.

Овшор. Юш гъэдэгъэ зерики э хуне уызге одомиге недебугу.

Содугъ. Гьелбет, кес ние дебу э ижире жиге, ме ки кес нисдуым, боженэгъ туьнуым.

Овшор. Э жун туь, у гъэдэгъэ зери, лап суьгде бирор туьш недебугу.

Тейло. Инжо екиш ниёв. Миомоге тегъони миомо.

Овшор. *(Э гъирогъ)*. Дирей туь ебо! Духдер не-лоигъ гьеммере вечарунд. Могъгъулже вирэхъ доребируым божере. *(Эз Тейло)*. Белкем омо?

Тейло. Омоге Содугъ мидарав э хунейге минуь-шуь...

Содугъ. Гъечуниге, э ме бэхшлемиш сохит. *(Вэ-хуьшдени эри ведарафде)*.

Оморени сес дере куфдеи.

Овшор. Эле, бебей ме вой! Омо, омо... Туь жун ме, боже, мевадаре. Туьре ведарафде виниге хубе кор нисди.

Тейло. Биё э хунейге дара.

Содугъ. НегI, ме эдем рафденуым.

Овшор. Туь жун ме, бэхшлемиш сох, Содугъ...

Тейло не Овшор гьерки эз ело гуьрде Содугъэ, э гужевоз дешенденуьт э у хунейге.

Овшор. *(Эз Тейло)*. Дер хунере сэхд сохди?

Тейло. Эри.

Овшор. *(Дере вокурдени)*. Диройт, диroyт...

Эз буру оморени сес эн е зен.

Зен. *(Эз буру)*. Хуней Овшоригъо инжои?

Овшор. О-о!.. Ёгъин мерд зен хуьшдереш оворди эхъисобевоз. Диройт!

Зен не мерд. (*Эз буру*) Эй дироморе минкин нисди.

Овшор. Чуьтам нисд, суьфре э шиму денишири.
Диройт, нуьшит...

Мерд. (*эз буру*). Де гьечуниге, зен, кеш дарайм.
(Мерд не зен диреморенуьт э шелегьоревоз. Овшор не
Тейло дуь эеки дениширенуьт, мэхьтел бире мунденуьт).

Зен не мерд. Шев ишму эхэйр бу!

Тейло. Эгъуьбет ишмуш эхэйр бу!

Овшор. Ишму?! Ишму?!.

Мерд. Иму? Иму гъуьбеигьоим, гъодоволим эз
туь. Эри туь эз Гъуьбе когъоз дори е дуст туь. Де туь
гуфдирики диройт, мугум суьфрей нэхойтуьре пой не
зенуьм. (*Норени шелере э ён дер, пезде шелере норени
зениш. Мерд ведешендени когъозе эз куьф, дорени э Ов-
шор*). Ги, гъэдоволим эз туь. Зен не мерд, куьрсигьоре
кешире, нуьшденуьт э гъирогъ вераюнде стол. Овшор
не Тейло энжэгъ дениширенуьт дуь эеки.

Овшор (*э гъирогъ*). Иш гьечи! Ме хьэрекет бируьм
божере эй пиш сохде, имогъой эз Гъуьбе эри ме гъу-
ногъгъо оморет. Хуней бебей туьре худо вечаруно, ой
Юсуьф! (*Чарусдени э лой мерд*). Ишму э и шелегьоре-
воз э вокзал рафдембирит эхьисобевоз?

Мерд. Эри, эдембирим э вокзал рафде.

Овшор. Денишит дир небошитгъо.

Мерд. СегIэт ченди гъэдоволим эз туь?

Овшор. Хьэшд.

Мерд. Гъеле вэхд гьисди эри нуьшде.

Тейло (*зури-зури денишире э сэгIэт хуьшде*).
И-и-и, сэгIэт эн у дуз нисд. Бисд минут э яздегьи кор
сохди.

Зен. Эле-е-е! Иму дир биреймки. Имогъой чуй
хуби?

Мерд. Де гьечуниге, зен, гье э игIэре михисим ми-
райм. Эз инжо зиьдте жиге нибу.

Овшор (*э гъирогъ*). Вечаруьсд хуней ме!

Зен. Ишму эйчуь нес нуьшденит?

Тейло. Иму э гъуногъ дениширейм.

Зен. Пой гъуногъ гыч эз хуней туь кем мегердо. Дирей мерд чуй гъукогъ севене одомигъоиге? Де гъечуниге биё эз стол куьнд нуьшим. Иму келетегъо куьнд несе нуьшденим гуфдире, сэхьиб хунеш нес нуьшде. *(Мерд не зен куьнд нуьшденуьт эз стол).*

Мерд. Хьуьрмет ишмуре худо хогъо, гъэдоволим эз ишму.

Овшор не Тейло гьердубеки дениширенуьт э пенжере.

Зен *(дес кешире вегуьрдени лэгъэре, песе э гуш мерд гуфдирени).* Игъо несе нуьшденуьт эхи?

Мерд *(вегуьрдени шишей шоробе, декуьрдени э чор пейле).* Сер меш несе ведарафде.

Овшор *(чарусдени э лой гъуногъгъо, бей рафдере хуно, хьэрой дешендени).* Ишму чуй сохданит?!

Зен не мерд мэхьтел мунде, пейлегъой шоробе норенуьт.

Тейло *(суйплове хэнде сохде).* Бэхшлемиш сохит ишму шелегъоре э пушой дер норейт, диреморегор ми-офдону мирасуь *(куьнд оморени эз шелегъо).* ГӀэмел миёв шелегъошмуре э е жигейге нуьм?

Мерд *(вэхуьшдени).* Туь эйчуь инжимиш бире. Иму миним. Вэхиз зен. *(Мерд не зен куьнд оморене, вегуьрденуьт шелегъоре, норенуьт э ён стол).* Инжо хуби?

Тейло. Э ёнлей эн у дер нит бурайт...

Мерд. Бошгу, духдер ме. *(Норенуьт шелегъоре э ён Содугъ дарафдигъо дер, гене нуьшде э жигешу, вегуьрденуьт пейлегъоре).*

Овшор *(серсоне хуно куьнд оморени эз телефон. Э гъирогъ).* Дирейт ишму и Юсуьфе?!. *(Номер Юсуьфе хосдени).*

Тейло. Бэхшлемиш сохит э ме, егилейгеш инжи-миш сохум ишмуре. Э иму гӀэдот дери, гъуногъ эз дуре рэхь омоге миё десгъоре шуру...

Мерд не зен гене пейлегьоре норенуьт. Дениширенуьт э десгьошу, вэхуьшденуьт.

Зен. Тозе г'эдотгьошму, г'эдоволим эз туь, э куьгьне метелегьо ухшеш зере. Г'евелгьо гуфдирембируьт: «Кими одоми чендг'эдеш шуштге гене десгьоре темиз сохде нидануь»...

Мерд. Умывальник ишму эжеи?

Тейло (*деспоуре эз г'иче вегуьрдени*). Э х'ээти, кешит бурмунум. (*Эз ён Овшор гирошдеки гуфдирени*). Гене зенг зе эри Юсуьф! (*Дере вокурде, ведебердени зен не мерде э х'эёт*).

Овшор зури-зури куьнд оморени эз телефон, зенг зерени.
Эз х'эёт вогошдени Тейло.

Овшор (трубкаре норени). Нэг! Жог'об дорегор нисди. Чуь сохим имог'ой, чуьтам вирэхь дим игьоре эз хуне? Чигьоре вечиним?

Тейло. Песде келей туь омоге?

Овшор. Э нимей рэхь муно у э Юсуьфевоз! Де чуь сохим?

Тейло (*сере гуьрдени*). Э серме веригьо эг'уьлг'ош не вомунди. Туьш чуь сохдеге нисе дануьсде. Ебо не дире, не дануьсде: «Диройт... Суьфре э ишму денишири...» (*Эз зуг'ун Овшор сохдени*).

Овшор. Ме чуь дануьм... Туьре зуг'ун эри чуь веромори?! Мегуьруьм миведекуьнуьм. Кинуьт бегем иг'о!..

Тейло. Эри, е у кор мунди сохдени. Э шег'ер биё бур биреймгьо вес нисди, имог'ой э Г'убеш мибошим.

Овшор. Де чуь сохим?

Дер вокурде оморени, диреморенуьт зен не мерд.

Мерд (*э ён дер*). Биё зен пойвокуг'ореш векеним, егилейгеш эй невэхуьшде. (*Пойвокуг'оре векенденуьт*,

песде нуьшденуьт э жигешу, вегуьрденуьт пейлегьой шоробе).

Оморени сес дере куде.

О в ш о р. Омо эхьисобевоз. (*Эз мерд не зен*). Вэхизит, тэвэгъэ сохденуьм. Вэхизит э у хунейге дарайт, инжо миё келей ме биёв.

Мерд не зен гене норенуьт пейлегьоре, вехуьшденуьт.

М е р д. Эле! И биёбури бисдоки...

О в ш о р. Ме эришму себэхъ эзи зиёдте суьфре миваравунум.

З е н. Эз себэхьине дуьшпере, гъэдоволим эз туь, имбурузине гьингъэр хуби.

М е р д (*куьнд оmore эз шелегьо*). Веги, зен, имуре инжо кор неде. (*Гьердуьеки вегуьрденуьт шелегьоре*). Кеш!..

Овшор не Тейло гуьрденуьт пушошуре.

О в ш о р. Мевадарайт, гIэйби эз келейму, тэвэгъэ сохденуьм эз ишму.

З е н. (*э гъирогъ*). Эле! Игьо бегьем номуссуьзики!

Т е й л о. Э у хунейге дарайт...

М е р д. Омбор согъбошит...

З е н. Не нуьшде гьишденуьт, не рафде. И чуй кори э сер иму омо! Овшор не Тейло э гужевоз, гьуьл додоре, дешенденуьт мерд не зене э у хунейге, пушо сохденуьт дере. Овшор вокурдени дере эз лой хьёт. Дироморени Юсуьф, хэсдере хуно.

О в ш о р. Не офди?

Ю с у ь ф. Ме гьеле сес гофе-гоф шиновусденге эз лошму, шор биребуьруьмки. Гьечу дануьсдуьм келей туь инжои.

Тейло, хэсдере хуно, нуьшдени.

О в ш о р. Э хунешу рафдебири?

Ю с у ъ ф. Ингъэдер куфдебуьруьм дер эн угьоре, зен гъунши ведиромо мугу не дери э хуне. Пуьрсуьруьм эжеи, гуфдики, зен ю э гІэилгьоревоз э хуней дешу рафди, шуьвер ю э хуней боженэгъ хуьшде...

О в ш о р. Боженэгъ?!

Эз у хунейге, э сес Овшор ведиреморени Содугъ, э песой энү мерд не зениш.

С о д у г ъ. Туь э меревози?

Ю с у ъ ф. *(суьфде мэхьтел бире дениширени э Овшор не Тейло, песде чарусдени э лой Содугъ)*. Содугъ?! Саша!.. Туь инжои? Ме туьре эз гешде гьолок биремки! Туь чуьтам оморей инжо? *(Чарусдени э лой Овшор не Тейло)*. Ишму э ки дениширейт? Ини келей туь, Овшор!

Овшор не Тейло: Чуьтам?! *(Гьердуьшу, гъэргъ бире, поисденуьт э жигешу)*.

Перде.



МЕТЛЕБ ЗИНДЕГУНИ.

Вози сохдегорго:

Писэхь — директор, 55 сале.

Сироти — зен Писэхь, 45 сале.

Довид — кук эн угьо, 25 сале.

Шекер — зен Довид, 23 сале.

Заренгуьл — гъунши эн Сироти, килчее чогъэ зен,
45 сале.

Роза-Гъуьзугуьл — секретарь эн Писэхь, 20 сале.

ЕКИМУЪН КАРТИНА.

Хуней Писэхьи. Э миглей хуне гиргине столи. Э хори келе сумогъ дери. Эз тараф чеп — дер э доруни хуне. Эз тараф расд — дер э хъэет. Э минжи дуь дери диван, э зверсер диван, дуз те хори, келе раче холинче. Э ён дер э хъэет — этажерка э книггьоревоз. Э тараф чеп, эз дер пушо, буфет. Э лой чеп, лап э гъирогъ сегъне, чуькле столле ве телефониш э сер ю. Э дуь лой столле чуькле креслогъо.

Эз хъэет диреморени Довид. Э тени ю парталгъой кори. Куьнд оморени эз этажерка, вегуьрдени е-дуь книг. Э фикир домунде, евошлей куьнд оморени э гъирогъ сегъне. Книггьоре э дуь деси э ён сине гуьрдени.

Довид. НэгI! НэгI! Ме нидануьм рази бире э гофгъой бебейму! Гъер инсоне сенигIэт ю миё бу, чуьнки э дануьсдеи ве эз дуьли сохде биёвгъо коревоз эри ватан ве эри хэлгъ хуьшде гъич кор тен бире нидануь.

Эз доруни хуне жару зере-зере ведироморени Сироти.
Гьеебо Довиде дире, бирази хьэрой вегуьрдени.

Сироти. Эле-е-е!.. Сер эни сумогъ гене эз чуй чуьлки бисдо? *(Довид фегьм сохдени иловлей хуьшдере. Сироти куьнд оморени эз Довид)*. Эз гуфдиреш вомундем! Ебо и парталгьой фэхълеи эз тен туь кей мифурав?!
Довид. Туь гьечи эдей пуьрсире, мугуиге гьеммей эни чуьлкигьой куче э ме вогосири! Э хори сумогъ дери гуфдире ме гешдеш ние гешдуйм? Зурбои! Де лап туь гьечи эз ме визор оморейге — хуне мигуьруьм миведарам!

Сироти. *(Э сер офдоре, сесе ёвош сохдени)*. НэгI, хэлефме. Ме эри хуьшде нисе гуфдиренуьм, жун ме жегьендем. Эри туь эдей гуфдиренуьм. Визор не оморей эз фэхълеи сохде? Дуь салними эз солдати оморей, и партолгьо гьич не фурамо эз тен туь. Эз хэлгьиш гIэйбики!

Довид. ГIэйби? Фхъле бире гIэйби? Де гьечуниге дегь гьозор фэхълей шегьер иму эз гIэйб э кучеш ние вадарав!

Сироти *(скатерть серстолире дуз сохдени)*. Фэхъле екини, туь еккейге! Бебешму, чум дуйшме векеденни, чен туьш не хундики. Веги виниш!.. Туь худо мебуро, дегь класиш варасдей...

Довид *(хэндуйсдени)*. Эз и гIэйб оmore ишмуре?

Сироти. Гьеле и кеми? И хэлгь нигую: бебей эни директор кор сохде, э рузию эллиминжире хэлгь эдей оmore-рафде экию эз келе гуьрди, те чуькле, кук хуьшдере э е келете гьуллугь дешенде нисе дануьсде? Эй бебешмуш хуьрдиники!

Довид. Ебореимуьнжи гьер фэхълере сенигIэтьюни, десгьошущ э суьрхэвез боронбори. Фэхъле бире гIэйб нисди — буьзуьргини! Ве дуйбореимуьнжи — эз товун ме ишмуре гIэйб меёвгу. Ме руз эдей кор сохде-

нуым, шев — э техникум хунде. Ме ижире рэхь норем эриме! Ишму гуфдиренитгьо рэхь мере герек нисди!

Сироти (*гзэгьрелуь*). Одоми тэгIэл нибу, э гоф келетей хуьшде миденишуь. Деде-бебе эри ферзенд хуьшде зобуни ниhoю! Эз у бегъэй дан эри туь, эз хубе кор пулиш, ве чемчигъойгеш медиров. Зиёдие пул, хэлефме, куьфе сула нисе сохде.

Довид. НегI! Дес кешит эз ме! Мере сенигIэт гереки! (*И гофгьо э лэгIэ дери эз доруни хуне зури-зури ведироморени Писэхь.*)

Писэхь (гзэгьрелуь). Чув сенигIэт-сенигIэт бисдо! Эз туь бэгъэй де э шегьер одоми недери. Эз и э гиснеи муьрденигьо, эз келегедни паре-паре биренигьо одомгьоре хунои туь. СенигIэт, сенигIэт! Ини, э пушой чумгъой туьни, диплом агроном э куьф деригьо эдей пирошки фурухде, учитель — э туку кор сохде. СенигIэт нисди метлеб зиндегуни инсон! (*Куьнд оморени эз буфет, вегуьрдени пачкегъой пуле*). И гереки! Пул! Пул! Ини метлеб жун инсон! (*Шендени пулгьоре э хори*). Чуменигьо эдей кеф сохде, чутьуьнигьо кемер хуьрд сохде! Имогъой вих чув хубиге!

Сироти. (*Гьуз бирени э сугьрезани пульгьоре эри вечире*). Эле-е-е!.. Туь чув сохде! Пулгьоре вегуьрди э хори шенд?..

Довид (*хэндуьсдени*). Э гъувот гъулгьо ве э эрэгъ жендек сохде оморе пулгьо нисди, гъовое пулгъой, эз у эдей шенде. (*Эз Писэхь*). Ме сабуьр сохдебуьруьм, оммо имогъой мугуюм. Э посой туь гьисдигьо кумекгьо — угъош туьре хунои! Оммо дануьсдебош, бебе, гьемише ижире коргъойтуь эз сер нигирору.

Сироти. Ебо дирей туь ире!

Писэхь. (*жингире хуно*). Вир бош! Вир бош эз пушой чумгъойме! (Довид ведарафдени. Писэхь гьебо гуьрдени гьутинере). Ой! Ой!

Сироти. Гене дендуни? Сериебо гзэгьр бире, оморени дендунедерд гуьрде юре. Шувкуьр мунош бэхде-

вер, тэхд туь буьзуьрг, ферзендиш эри одоми гӀэжел мибу?!

Э се-чор дэгьдэгьэ товуш муьрдени.

ДУБИМУЪН КАРТИНА

Гье у хуней. Себэхьмундеи.

Писэхь. *(сифет бесде, эдей ноле зере гешде э хуне)*. Ой! Ой! И дендунедерд эз же омо офдо э ме эде?! Э жун ишму хурде ширгьой дедей ведиромо эзме э е шев. Ох! Э Сироти! Э Сироти!!!

Эз хьээт дироморени Сироти.

Сироти. Туь э меревози?

Писэхь. Эжеи туь гене? НимсэгӀэт эдей огол зеренуьм жогьоб дорегор нисд...

Сироти. Э хьэетилеймуревоз эдембуьруьм гоф сохде.

Писэхь. Погь, бебейме вой! Эз жейтуь ведироморе ингъэде гоф, мэхьтелуьм. Эз омбор гоф сохде зугьунгьо дураз мибисдоге, зугьун туь теимэхэли э дурази расей рошогӀ мибисдо!

Сироти. Весси туьш... о...

Писэхь. Гьери у пинджек мере веги биёр. О! Ох!..

Сироти *(пинджеке чутке зере дорени э Писэхь)*. Э же рафде туь гьечи? Ебо э гузги виниш хуьшдере э сифет туь ранг неве, мугуиге нехогьгьойтуьре эз гьовре вегуьрди э гьирогь норе. Имбурузиш э кор не рафдиге чуь мибу бегем?

Писэхь *(э гъэгьревоз)*. Э зугьун туь мар вепичо, е хубе гоф эз туь не шиновусдумге! Эдем э больни-

ца рафденуым. Э кор зенг зе гуки эз секретарь ме, е духделе кор сохде унжо...

Сироти. У Роза гуфдиренигъои? ГӀэселе духдери, мере эз дур диренге руз эхэйрбу доре, муйгъоюш...

Писэхь. Туь е минут лэгӀэ гуьрдени небуге нэгӀ?! Ме эдем эз денду пар-пар сохде, зугьун эни зугьун дилиможе гъэлебегире хуно бири. «ГӀэтлуьре эз пееде чухэбери!.. Ох! Зенг мизени мигуики директор нечогьи, оморе нидануь. Зиэди нэгъуьл мэхун, гьечинигеш коргьой ме шифи гьейсэгӀэт. Варасири? Ох!..

Сироти. Бошгу! Бошгу! Тенги мекеш...

Писэхь. Десе э гьутине гуьрде ведарафдени.

Сироти. (Фикирлуь). Сер ме эз Писэхь нисе ведарафде. Эз у рузевоз эз Министерство омори ежирере хунои, э дуьл гоф гуьрде одомире хуно... Гоф юш эз уло омо: «Коргьой ме, мугу, шифи гьейсэгӀэт...» Е кор гьисд э хьисобевоз дие! Е кор небиреки нибуки се-чор руз пушо, зен келей эн шегьер иму, гьеммише мере текелифи дорембугьо, пире кафтар, зе гирошд, гьич недирере хуно... Пери, эри пери бу дие, э туку эдембуьруьм эри ме эз и тозе шляпагьо восдоре. Э сер ме веноре фегьм сохдеки е зен мэхъэлеиму э хэндеревоз мугу: «И килэхь э сер туь гуьре нисди». Песде диеш шэгьгэ зере мугу: «Гьер сере э ю гуьнжое килэхь миё бу!» Ме варасируьмгьо эз же оморембуге у гофгьо, ме хэр нисдуьм, оммо сабур сохдуьм.

Чум дуьл ю нисе вегуьрде шуьвер ме директори гуфдире, бэхиле сег. Шуьвер ю эз институт бэгъэй гене чуйнигеш эдей варасде, имогьоиш мунди рафде пэсхьэрмэхью. Э негьогь нисе гуфдире: чум вэхиле векено худо...

Сес дер куде.

Зарангуьл. Э Сироти! Туь э хуне дери?

Сироти. Зарангуьли? Диро! Диро, хэгьерме. Е туьни дервокуйме. Дуьл ме ежире биребу мунде.

З а р а н г у ь л. Чуви бегем? Хэйр гердо! ГЭилгьо эжи?

С и р о т и. Эгь..! ГЭилгьой гьейсэгГэти гЭили бегем — мар-молкомут. Кукмеш угьоре хуно... Э бебешуревоз хьуьжет сохде, э гоф ю нисе денишире...

З а р е н г у ь л. Эйчуь гьечи?

С и р о т и. Эдей фэхълеи сохде, кемерхуьрди. Э ше-гуьрти дарафди э чуьжоиге. Эз кор оморени гьеммею чуьлки, эз сер эни темизе хоригьо эдей зере гиросше. Э гьэд эн и фэхълего домунди рафде. Бебешу, чум дуьшме векедени, э гьэд дегь мерд е мерди, э миглей бигьбуренгьо дери, э ю сарф небугьо одомире руз эхэйрбуш нисе доре. И эки омorige нисе дануьсденуьм. Гье у лелешуни, худо михьило сохо, одомиш буге сук бу, э гЭилгьоревоз мундебу рафде. (*хэндуьсдени*). Писэхь эдей гуфдире: «Биё, хэлефме, э е келете кор дешенуьм туьре...» Туь дануьсденики, бигь ишу ченд кукме гьисдигьо гьейсэгГэт э келе кор дарафде нисе дануьсде. НэгI-o-o! Э ки гуфдире! Эз бебешу мугу: «Имбуруз туь мере начальник мисохи себэхь мере эз кор миведекуьнуьт. Мере сениГэт гереки. Угьо гьемме е рузине коргьои».

З а р е н г у ь л. ГЭили дие, чуь варасире игьо.

С и р о т и. Мугум, хэлефме, бебешму согь гУьмуьр хуьшде, хундеиюш зиёди небириге, сениГэтсуьз э келе жигегьо кор сохди. Туьш гьечу. Писэхь эз ело, ме эз ело, хьуьрш сохд э сер иму ведарафд.

З а р е н г у ь л. Гьэйгьу нисди, хьуьрш жогьилгьо, кулоке хуно, омбор нисе мунде. Эри... и..., э хуней Беневше хэгьергилилейме рафдебуьруьм имбуруз. Десе э хиней гЭилгьойтуь доно гЭаруьс эн уре кукле бири, е бэхдевере гЭиллеи. Э сер кук бирейгьой хэлефтуь биёво. Эжи и гЭаруьс туь эй, дуь салики? Дуьл имуш хьэл бисдо...

С и р о т и. ГЭаруьсме? Мере у куьшдики! Мере ужи-ре мозол эз же омори! Гьеле эз у бэгьэй э гофмеш нис-

ди. Мугум эз и хэре кукме, биё и хуышге бейгьуше ви-
рэхь ди, гьечи э серме и омо, э сер хуруз-вече биёвгьоре
хуно.

Заренгуыл. Небуге чуыи, ишму и хуърде совуре
э хуне гуърдейт! Туь мунош, Сироти, е духдер ме ши-
нохденуым: рач, эгьуылменд. Лап, э туь эдей гуфдире-
нуым, тои эри Довид.

Сироти. У туь э ме гуфдиребиригьо?

Заренгуыл. Эри. Э туьревоз ГӀесел не руьгьэре
хуно мубу. Эйме оmore туьш шинохдени уре эки Пи-
сэхь кор сохдеки...

Сироти. Эки Писэхь? Нум ю чуйтами?

Заренгуыл. Гьуьзуьргуул.

Сироти. Гьуьзуьргуул? Э ёр ме нисд... Сес дер
куфде.

Сироти. Кини у?

Роза. *(Эз буру)*. Лелей Писэхь э хуне де?

Сироти. Диройт киниге у! Муйгьой хуьшдере дуз
сохде-сохде дироморени Роза.

Роза. Руз ишму эхэйр бу!

Сироти. Э гьубеттуь эхэйрбу! Эле Розаи?! Диро,
хэлефме, э ён дер мепой. Лелей Писэхь ишму шову
чуьк-чуьк сохде те себэхь хисире недануьсди. ЕсэгӀэте-
лейге э больница рафд.

Зарангуыл. Эле чуыи бегем?

Сироти. Эз дендунедерд. Гуфдиреш гуфдигьо — э
кор зенг зе мугу. Мере минкин бире бегем! Те эз базар
оморе, те кергьгоре берде эки раби куьшде, овурде, те-
миз сохде, э холодильник деноре, те сумогьгоре туьр-
туьр сохде, те сергьой сервантгьоре вечире вэхд варасд
рафд.

Заренгуыл. Э Сироти! ГӀзил э пой мунд рафдки.
(Эз Роза) Гирор нуьш, хэлефме. *(Чум зерени духдере.*
Песде чарусдени э лой Сироти). Ини у Гьуьзуьргуул
ме гуфдиренуымгьо, имогьой шинохди? Чуйтам оmore
эри туь?

Сироти. (*Хэндуйсдени*). Розачка, биё нуыш. (*Куьрсире норени эри духдер*). Бебеле-бирор туь муно хьэло-ле шир хурдей. Гоф туь дебу э лэгІэйму. Холей Заренгуыл ишму эз туьре тэгІриф доре вомунди: е хубе, е раче, е эгъуылменде духдер эки Писэхь кор сохдени мугу, хьэз оmore одомире денишире. (*Дарафдени э у хунейге, ведировундени бишгьоб емуьше, норени э пушой Роза*). Гъуьзуьргуул гуфдиренге ме дануьсдуьм туь биреире.

Роза (*гІэйб оморере хуно*). Ишмуш холей Сироти лап тэгІриф медитгьо...

Сироти. Хубе, хэлефме, тэгІриф мидуь. Веги ху, гІэйб меьвгу туьре, хуней туьре хуно биёвгу эри туь. Хьэз оморени туьре эз хунейму?

Роза. Эри сумогъгьошму лап рачи.

Сироти. И сумогъгьоре Писэхь эз куьгьне кор хуьшде овурдебу. Э унжигеш бэхиле сеггьо е сал бэгъэй негъишдуьт кор сохде. Когъозгьо дешендуьт, чуьш сохдуьт...

Роза (*вэхуьшдени*). Эле, ме нуьшдем поисдеки. Бэхшлемиш мисохит, холей Сироти, ме биё бурам. Эз лелей Писэхь мигуитки эз Министерство келегьо оморет, э ю дениширет...

Сироти. Бошгу, хелефме. Гьечинигеш биё-бура, гІэйб меьвгу туьре.

Роза. Согъбошит. (*ведарафдени*).

Заренгуыл. Пэселе духделен!

Сироти. Бэхдевере чи! Хэре кукме, э гоф муьрде дей недеши.

Оморени сес телефон.

Сироти (*вегуьрдени труькере*). Кини? Туьни, Писэхь? Дендуйтуь чуьтами? Бошгу! (*норени труькере*). Худомеерош муьрдебу мерд шову.

Заренгуьл. Дендунедерд гьечуни дие, ношумой одоми ведарафде те дордорею поисде.

Сироти. Гье вэхуьшди, гешди ноле зере-зере, парпар те себэхь.

Заренгуьл. Эри, хэлефме, э сер ме омори у кор, мере хэбери эз у хьэйф. Эй гьемме дерд дерму гьисди, эз дендунедерд бэгьэй. Эз шуьгьэм дорд доре — коплини, эй сер дорд доре дерму гьисди, эй эни — гьичиш. И аслане базугьойме эз дендунедерд хьэл не бири бегем. *(бурмундени чогаэ десгьой хуьшдере)*.

Сироти. Хисире ки дануьсди шову. Етир зере, пембе не мунди, спирт не мунди, эхир нимей газете сухундем, руьгьэре э дендую декуьрде. НэгI-о-о! Эз гьичиш чоре небисдо. Гье екем гьэгьр биренге — оморени эз денду гуьрде юре. Худо сад сал гIуьмуьр, хьофдод сал дендунедерд до э Писэхьлейме ки бэхили сохдеге... Туь и хэре Бетиёре шинохдени, э мэхьэлейму зигьисденигьоре?

Заренгуьл. Хэре Бетиё кини?

Сироти. Э-э-э! Туьш одоми нисе шинохде. И фиш-фишле, шуьвер ю э аспирантуреиге, э чьуниге хунденигьо.

Заренгуьл. И Бетиё, депутат горсовет?

Сироти. О..! О..!

Заренгуьл. И мигIид биренге э келегьой шегьеревоз биренигьо?

Сироти. Эри гье у фиш-фишле. Шуьвер энэ э ки Писэхь кор сохде. Эки хэлгь сес ведешендики: Писэхь фэхьлере руз эхэйрбу нисе доре, хуьшдере келе гуьрде, хэйли гофгьоигеш... Эй муьгIуьжуьз дире мундем! Директор хуьшдере келе мигуьруь дие. Небуге зенчее шуьвер энире хуно гIэиле э дес гуьрде э миглей куче мигешдуь, парталгьой зере мишуру...

Заренгуьл. Эри, хэлефме. ГьейсэгIэтинэ шуьвергьо зенгьоре зиёдие кор сохде нисе гьишде, гьеммере ишу сохденуьт.

Сироти. Сохугьо муно жегьендем. Мере дерд энунисе гуурде, зиэдие гьфгьо несохуге... Ди себэхьмунде эдей эз базар оморенуым, диренуым и фиш-фишле э хэгергилиревоз э ихдилот дери. Ме эз ён ишу гирошдеки, э хэндеревоз эдей гуфдирегьо: «Э сер хэр суьрхиш венориге — гене хэри». Меш хунме э ширме гьэриш бисдо, чаруьсдуым мугум: «Э хэр чарош, э вечехэр!» Гьечи игьо инжо бисдо, мугуиге биренгьине зе вогосунд игьоре э хори. Песде гуфдире эз мегьо: «Туь жингире хунои!» «У зугьун туьре мугум мар зено, молкомут!» Хьэйф, омо одомигьо кура бисдо, небуге ме гьечи шелей эн уре медорум...

Э буру оморени сес пойгьо покурде.

Сироти. Писэхь омо э хьисобевоз.

Заренгуьл. (*Вэхуьшдени*). Меш бурам...

Сироти. Нуьш гьеле дие.

Заренгуьл. НэгI-о-о! Шори биёвом э туь э ники. (*Ведарафдени*).

Дироморени Писэхь.

Писэхь. У зен ки бу эз хунейму ведарафдгьо?

Сироти. Хэгергилилеймени.

Писэхь. Эдей гуфдирекуьм эхи ловгьой туь эйчуь кеф сожди.

Сироти. (*Гьэзьрелуь*). Де веги килит вени э лэгIэйме! Э негьогь нисе гуфдиреки: «Ме эри туь муьрдеки, туь эри ме пойпичеки.» Туьш гьечу!

Писэхь. Де бошгу, эзун метелгьой туьре ме амбар шиновусдем. Даре е ламбалуш ведировун, шову нехисирем, екем дегешдуьм.

Сироти дарафдени э у хунейге эри ламбалуш. Писэхь лэгIэре вокурде, э энгуьшдевоз дендуре жумундени.

Сироти. (*Ведировундени назболуше, дешендени э сер диван*). Биё дегешд!

Оморени сес телефон.

Писэхь. (*Вегуьрдени трубкаре*). Эри, эри! Руз эхэйрбу! Э жунтуь муьрдебуьруьм. ГьейсэгIэт? Мигуиге тозе эз деде бирем Туь эз же дануьсди? Эз ки эз зен туь? Эри ю Сироти гуфдири мугу? (*Хэндуьсдени*). Эри, бирорме, зугьун зенгьо ве телефон нибисдоге, хэлгь гьич сур екире нидануьсд. Шохьонгум? Бошгу, биё нуьшим!

Сироти. Ки бу?

Писэхь. Уш гереки туьре? Туь жун эн у шилповхуре бебешму, эз пушой ме вир бош есэгIэт. Е биренгьине зере у зугьун туьре лол мисохдге, гьич нигуфдурум муьрдегьой ме муьрди гуфдире. (*Дегешдени э сер диван*).

Сироти. Ме инжо зиёдие гоф сохдум? Небуге гьэгьр туьре эз ме ведешенде? (*Вегуьрдени эз сер стол емуьшгьоре*). Эри, Роза оморебу, эки туь мугу, келегьо омори эз Министерство.

Писэхь. (*Бирден вэхуьшдени*). Те имэхьэли и гофе не гуфдирей э ме?! (Зури-зури вокурдени пинджеке, ведарафдени). Э се — чор дэгьдэгьэ муьрдени товуш.

СЕИМУЬН КАРТИНА

Гье у хунегьои.

Шекер. (*Гирисде-гирисде ведироморени эз доруни хуне, песде покурдени э ейлуггэвоз чумгьоре*). Ме чуй сохум?! Дегь энгуьшдмереш гIэсели сохдумге, гене ченд огьу оморе эрию. И зене чуй воисдеге эз ме нисе дануьсденуьм. (*Гене гирисдени*).

Дироморени Довид.

Довид. Шекер чуйни бегем? Туь эйчуй гирисде? (*Эз гьул ю гуьрде, нушундени э сер куьрси*).

Шекер. (*Гирисде-гирисде*). Нисди мере инжо зиндегуни! Эз кор оморенге, дере вокурде, эдембуьруьм э хуне дироморе, шиниренуьм сес гофе-гоф дери. Гуш веноренуьм э товун мени... Не гуфдире гоф мундиге угьо!

Довид. Кигьо?

Шекер. Дедей не гӀэрегьэришкие Заренгуьл, махъэлейшму. Бейгуш, хуьшге дор, хуьрде сову, бебейме жон, де негуфдире гоф мундиге! Угьоре воисдени жейле соху имуре эз еки. (*Гирисдени*).

Довид. Туь чуй гуфдире? (*Нуьшдени э ён Шекер*). Э гуш меги у гофгьоре. Имуре екиш жейле сохде нидануь!

Шекер. (*ГӀэйбе-гӀэйб*) Эзи пенж-шеш руз пушо, имбурузиш, э кор серме гьэриш бире, верэхшире гуьрдебу мере. Духдир мугу имуре...

Довид. (*Шори-шори*). И расде гофи, Шекер.

Шекер. (*Ловгьой ю э хэнде верафдени*). Эри...

Довид. (*Шори-шори*). Имуре гӀэил мибу! Туь мере омбор шор сохди... (*Вэхуьшдени*).

Эз хьэет сессуьз дироморени Сироти. ГӀэилгьоре диренге э песой перде пэхьни бирени.

Довид. Имогьой меш туьре шоре бошорей дуьм — мере э завод мастер эн цех норет. Эз бисд рузиге техникумеш миварасуьм.

Шекер. (*Шори сохдени*). Омборек бу, Довид! Метлебгьойгейтуьш ире хуно э барас биёво! (Э хуьшде домундени). Расди четин мубу зиндегуниму инжо...

Довид. Тенги мекеш. Дануьсденуьм четини. Оммо иму эз дуьли жовониму вихдейм и, четиниш гьисдиге, софе рэхьэ. Туь варас, жон Шекер, эз иму бэгьэй бебедедеймуре екиш нисди. Эз у товне, угьо э имуревоз разиш нисдиге, э иму лоигь нисди угьоре шенде ведарафде. ВэгӀдо мибурмуну: имунимге дуз, небуге угьо!

Шекер. Бошгу, Довид... Эри, имишев е хубе кинои. Оморени бурайм?

Довид. Эри.

Шекер. Кеш гьечуниге парталгьоре дегиш сохим.

Гьердушу дарафденуът э доруни хуне. Сироти ведироморени эз песой перде.

Сироти. Зурбои гьейсэгІэтине жогьилгьо! Ишу воисдере сохденуът гьэрез. Оммо гуюм э ишму, лугьонди коре нисе дануьсденуът. Э имбурузине девр пул небугьо сэхьибсуьзи. Пул бугьоре — сэхьибш мубу, келете кориш мибу, мол-девлетеш...

Эз доруни хуне ведироморени Довид.

Довид. *(Мэхьтел бирени)*. Туь э хуне де бегем?

Сироти. ГьейсэгІэт дироморем.

Довид. Бебе эжи?

Сироти. Эз Министерство одомигьо омори, себэхьмунде рафдигьо, имогьош невогошди. Руз эдей варасде, дуьлмеш эдей хьэл бире.

Эз буру оморени сес пой покурде.

Сироти. Омо, эхьисобевоз!

Дироморени Писэхь, дес э чуне вери.

Сироти. *(Терсирени)*. Чуьни бегем? Туь гене чунере гуьрдей?

Писэхь. *(Десе э гьэгьревоз фушендени)*. Эгь! Бэхилгьо, гене сохдуът кор ишуре... Мере эз кор вегуьрдет. Ох!.. *(Гене гуьрдени чунере)*.

Сироти. *(Зэхьлележэгь)*. Эле, бебейме вой, чуьтам?

Писэхь. *(Гьэгьрелуь)*. Чуьтам, чуьтам герек гьисдигьоре хуно!

Сироти. Э жигейтуь кире нори?

Писэхь. Шуввер Бетиёре, сениГэткори гуфдире...

Довид. Тенги мекеш, бебе. Мегири эз дестуь веровгьо коре мисохи...

Сироти. (Гъэгьрелуь эз Довид). *Туь пой э жигей туь, пой э жигей туь, сер туь вадарафденигьо кор нисди! (Чарусдени э лой Писэхь).* Туь тенги эйчуь кешире? Бегем суьфдеи гиле ведекуьрде туьре игьо эз кор!? Эз гъэгьр гьеммей энугьо, гене мегири э хубе кор мида-рай! (*Рафдени эки буфет, вегуьрдени пулгьоре*). Пул! (*Эз Довид*). Ишму, хэре жогьилгьо, гьувот эн уре нисе дануьсденит. Пул сэхде гьопуреш мивокуну.

Писэхь. Нэг! Имогьой пулиш кумек бире нида-нуь. СениГэт небире четини гьейсэгГэт...

Сироти. Де игьо чуьни?! Бегем де игьо гьичиш нисд?.. (*Пулгьо тигьы бирени эз десгьой ю. Сироти сере гьуз гуьрде дениширени э пулгьо*).

Перде.



Дадашев Михаил.

Д 14 **Хьэлоле мерд** (Ихдилотгьо).
Махачкала, Дагкнигоиздат, 1971.
64 с.

((Тат)

Святой мужчина

Художник Л. Б р у з г и н
Редактор Х. А в ш а л у м о в
Художествен. редактор В. Л о г а ч е в
Технический редактор М. Х а н у к а е в
Корректор Б. С а ф а н о в

Сдано в набор 2/XI-1971 г. Подписано
в печать 22/II-1972 г.

Форм. бум. № 2 70×108¹/₃₂. Бум. л. 1,0.

Печ. л. 2. Усл. печ. л. 2,8. Уч.-изд. л. 2,47.

С 03036. Тираж 1000. Цена 8 к.

★

Дагестанское книжное издательство Управ-
ления по печати при Совете Министров
ДАССР, Махачкала, ул. Маркова, 55.
Зак. № 1079

Типография им. С. М. Кирова Управления
по печати при Совете Министров ДАССР,
Махачкала, ул. Маркова, 51.

Цена 8 коп.

Дадашев Михаил
СВЯТОЙ МУЖЧИНА
На татском языке

МАХАЧКАЛА 1972